

Siunnersuummut nassuiaatit

Nassuiaatit nalinginnaasut

1. Aallaqqaasiut

1.1 Nuummi Ilulissanilu nunani tamalaani mittarfiit ammarneqarneranni Kalaallit Nunaat nunanit tamalaanit soqutigineqarnerulersinneqarpoq. Nunami pissutsit atuuttut Kalaallit Nunaata soqutiginninneqarnernik eqqumaffigineqarneranillu sakkortusaataaginnarsimapput. Nunanit allanit Kalaallit Nunaanni pigisanik aalaakkaasunik pisinissamut soqutigineqartoq takutinneqartarpoq. Ilaatigut inissianik iluanaarniutissanik pisiortornissaq pinngitsoortinniarlugu inuit suliffeqarfiillu kikkut Kalaallit Nunaanni pigisanut aalaakkaasunut piginnaatitaanermik pisisinnaanersut imaluunniit atuisinnaatitaalersinnaanersut, kiisalu nunaminertanik atuinissamut akuersissutinik pissarsisinnaanersut pillugu maleruagassanik arlalinnik aalajangersaasoqarnissaa Naalakkersuisunit kissaatigineqarpoq.

Nunami sumiiffinni politikkikkut inissisimaneq eqqarsaatigalugu, maleruagassat sapinngisamik sukkanerpaamik atuutsinneqalersinnaanissaannut, tamatumalu kingorna Inatsisartut inatsisaanni inatsimmut siunnersuutitut piaartumik suliarineqartussanngorlugu Inatsisartunut saqqummiunneqarsinnaanissaanut, 2025-mut ilassutitut aningaasaliissutitut inatsimmi oqaasertaliussaq ilanngunneqarpoq.

Inatsisissatut siunnersuummi matumani 2025-mut ilassutitut aningaasaliissutitut inatsimmi, suliassa qarfimmu 70-72-mut, Ineqarnermut Attaveqaasersuutinullu Naalakkersuisoqarfik, oqaasertaliussaq nr. 4-mi erseqqissaanerit aalajangersimasut ingerlateqqinneqarput. Oqaasertaliussaq Inatsisartut Aningaasaqarnermut Akileraartarnermullu Ataatsimiititaliaanit ulloq 31. januar 2025 ataatsimiinnermi akuerineqarpoq. Siunnersuummi matumani aammattaaq nunanit allamiut Kalaallit Nunaanni pigisanut aalaakkaasunut atuisinnaatitaanermik pissarsisinnaanerat pineqartunut ilaatinneqarpoq.

1.2 Kalaallit pigisanik aalaakkaasunik, taakkunungalu pigisat aalaakkaasut najugaqarfittut atorineqartut ilanngullugit, niueruteqarneranni niuerfik aammalu aningaasalersuinnermut periarfissat pioreersut, aningaasaqarnerup annertussusaa kiisalu Kalaallit Nunaanni aningaasarsiat qaffasissusaaq tunngavigalugit akinik aalajangersaasarneq neqeroorteqartitsisarnerlu annikitsunnguupput.

Avataaniit pigisanik aalaakkaasunik, nalinginnaasumik Kalaallit Nunaanni aningaasalersuinermit atorineqartartut avaqqullugit pisisoqartalernissaa pigisanik aalaakkaasunik niueruteqarnermi oqimaatigiiiffiusunik pioreersumik nikisitsinissamut annertuumik ulorianartorsiortitsisussaavoq, aammalu akit aalajangersarneqartarnerinik neqerooruteqartitsisarnermillu, inuiaqatigiit pigisanik aalaakkaasunik pigisaqarnissamut attartornissamullu periarfissaannut naapertuutinngitsunik pilersitsiviusussaalluni.

Pisisoq danskisut innuttaassuseqartinnagu, imaluunniit pisisoq suliffeqarfiuppat, suliffeqarfinnit danskisut innuttaassuseqartunit tamakkiisumik pigineqanngitsoq nakkutigineqanngitsorluunniit Kalaallit Nunaanni pigisamik aalaakkaasumik pisinissamut aamma nunaminertamik atuisinnaatitaaffimmik pissarsinissamut maleruagassiuussinissamut nakkutilliinissamullu tunngaviliinissaq siunnersuummi siulertarineqarpoq.

Siunnersuummi ilaatigut Kalaallit Nunaat ataatsimut isigalugu imaluunniit illoqarfinni nunaqarfinniluunniit aalajangersimasuni pigisanut aalaakkaasunut piginnaatitaanermik pisinermi imaluunniit atuisinnaatitaalerneq, avataaniit annertuumik aningaasaliissutaasunit Kalaallit Nunaanni pigisanut aalaakkaasunut akinik aalajangersaasarerup neqerooruteqartitsisarnerullu nikitsinneqannginnissaanut tapersiinissaq siunertarineqarpoq. Assersuutigalugu nunanit allaniit inissianik imaluunniit illunik inuussutissarsiorfiusunik pioreersunik pisisoqarneranit akinik aalajangersaasarneq neqerooruteqartitsisarnerlu sunnuteqarfigineqarsinnaapput, taamaalillunilu innuttaasut maani najugaqartut inissianik imminnut pilersorsinnaanerinit aammalu suliffeqarfinnik inuussutissarsiorfiusunik pilersitsisinnaanerinit killiliisinnaallutik akitsorsaataasinnaallutillu.

2. Siunnersuummi immikkoortut pingaarnertit

2.1 Inatsit atuuttoq

Inatsisartut, Aningaasaqarnermut Akileraartarnermullu Ataatsimiititaliaata 2025-mut ilassutitut aningaasaliissutitut inatsit, suliassaqarfinnut 70-72 Ineqarnermut Attaveqaasersuutinullu Naalakkersuisoqarfik, oqaasertaliussaq nr. 4, ulloq 31. januar 2025 ataatsimiinnermi akueraa. Oqaasertaliussami pigisanik aalaakkaasunik pisisarnermut maleruagassisoqarpoq. Oqaasertaliussap atuutilerana uani www.nalunaarutit.gl ulloq 1. februar 2025 saqqummiunneqarpoq.

2.2 Siunnersuutip imarisaa

Inuit danskisut innuttaassuseqartut, aammalu ingerlatseqatigiiffiit aningaasaliiffiusut taakkunannga 100 %-inik pigineqartut, Kalaallit Nunaanni pigisanut aalaakkaasunut piginnaatitaanermik killilersuiffiunngitsumik pisisinnaassasut imaluunniit atuisinnaatitaaffeqalersinnaassasut, imaluunniit Kalaallit Nunaanni nunaminertanik atuisinnaatitaassasut siunnersuutigineqarpoq.

Siunnersuutigineqarpoq, inuit danskisut innuttaassuseqanngitsut, aammalu ingerlatseqatigiiffiit aningaasaliiffiusut taakkunannga 100 %-inik pigineqartut Kalaallit

Nunaanni pigisanut aalaakkaasuut piginnaatitaanermik pisisinnaassasut imaluunniit atuisinnaatitaalersinnaassasut, imaluunniit Kalaallit Nunaanni nunaminertanik atuisinnaassasut inuk:

- 1) Kalaallit Nunaanni aalajangersimasumik najugaqarpat aamma inuit nalunaarsorsimaffianni nalunaarsorneqarsimappat, tamannalu ukiut siuliini marlunni amerlanerusuniluunniit pisimappat, aamma
- 2) Kalaallit Nunaannut tamakkiisumik akilersaarsinnaatitaappat, aammalu ukiut siuliini marlunni amerlanerusuniluunniit Kalaallit Nunaannut tamakkiisumik akileraartussaataasimappat.

Piumasaqaatilli taakku pigisamik aalaakkaasumik, nammineerluni inigisassamik imaluunniit atuisinnaatitaanermik atuukkallartussamik pisinermut atuutinngillat.

Siunnersuutigineqarpoq, aningaaseriviit, realkredit-imik taarsigassarsititsisarfiit, ingerlatseqatigiiffiit aningaasaliissutinik aqutsisartut, sillimmasiisarfiit, taakkunungalugu ilanngullugit inuunermut sillimmasiisarfiit kiisalu soraarnerussutisiassanut aningaasaateqarfiit aamma suliffeqarfiit soraarnerussutisiassanik katersuisarfii il.il., Danmarkimi, Kalallit Nunaanni imaluunniit Savalimmiuni najugaqartut, aammalu Finanstilsynet-imit imaluunniit Tryggingareftirlitið-imit nakkutigineqartut, Kalaallit Nunaanni pigisanut aalaakkaasunut piginnaatitaaffimmik atuisinnaatitaanermilluunniit pisisinnaatitaassasut, kiisalu nunaminertanik atuisinnaatitaassasut.

Taamaalilluni aningaaseriviit realkredit-imillu taarsigassarsiniartarfiit Kalaallit Nunaanni pigisanik aalaakkaasunik niueruteqarnermut akuusutut ilaasinnaalernissaat, aammalu Kalaallit Nunaanni pigisanut aalaakkaasunut akinik pilersitsisarnerup neqerooruteqartitsisarnerullu patajaatsumik eqqoriaruminartumillu ingerlatiinnarneqarnissaannut iluaqutaasinnaanissaat pingaartinneqarpoq. Aammattaaq aningaasaqarnikkut sullissiviit taaneqartut, Finanstilsyn-imit aamma Tryggingareftirlitið-imit nakkutigineqarnissaat pingaartinneqarpoq.

Taamatuttaaq Namminersorlutik Oqartussat kalaallit pigisanik aalaakkaasunik niuerfiannut tunngatillugu aningaaserivinnik, realkredit-imik taarsigassarsititsisarfinnik aamma Finanstilsyn-imik pisortatigoortumik suleqateqarnissaat pingaartinneqarpoq. Kiisalu Namminersorlutik Oqartussat pensioninik katersuiviit suleqatigalugit pensioninik katersuiviit Kalaallit Nunaanni pigisanut aalaakkaasunut aningaasaliisarnissamut periarfissanik sinaakkutissanillu misissuinissaat pingaartinneqarpoq.

Inatsimmi siunertaasoq eqqarsaatigalugu Kalaallit Nunaanni pigisanut aalaakkaasunut piginnaatitaanermik pisisinnaatitaanerup imaluunniit atuisinnaatitaanerup ilaqutariit akornanni kingornussinikkut, pigisanik avitsinikkut tunissuteqarnikkulluunniit killilerneqarnissaa tunngavissaqartutut isigineqanngilaq.

Tamatuma saniatigut Kalaallit Nunaanni pigisanut aalaakkaasunut piginnaatitaanermik pisinissami imaluunniit atuisinnaatitaalnissami, imaluunniit Kalaallit Nunaanni nunaminertamik atuisinnaatitaanissami Naalakkersuisut allakkatigut akuersissuteqarnissaat piumasarineqarpoq. Siunnersuummi Naalakkersuisut qanoq ilinerani Kalaallit Nunaanni pigisamut aalaakkaasumut piginnaatitaanermik pisinissamut imaluunniit atuisinnaatitaalnissamut, imaluunniit Kalaallit Nunaanni nunaminertamik atuisinnaatitaanissamut akuerineqarnissamik qinnuteqaatinut itigartitsisinaanersut itigartitsinermiluunniit nalunaaruteqarsinaanersut, imaluunniit akuersisinaanersut maleruagassiuunneqanngilaq.

3. Pisortanut aningaasaqarnikkut allaffissornikkullu kingunerisinnaasai

Siunnersuut pisortanut aningaasaqarnikkut allaffissornikkulluunniit kinguneqassanngitsoq naliliisoqarpoq. Naliliineq malillugu Kalaallit Nunaanni pigisanut aalaakkaasunut piginnaatitaanermik pisinissaq imaluunniit atuisinnaatitaalnissaq, imaluunniit Kalaallit Nunaanni nunaminertamik atuisinnaatitaanissaq pillugu suliat, Naalakkersuisoqarfimmit akuersissummik pisariaqartitsiffiusut killeqartuinnarnik amerlassuseqarput, aammalu aningaasaliissutaareersut iluanni aqunneqarsinnaasussaallutik.

4. Inuussutissarsiortunut aningaasaqarnikkut allaffissornikkullu kingunerisinnaasai

Naliliineq malillugu siunnersuut imminermini aningaasaqarnikkut allaffissornikkulluunniit kinguneqartussaannngilaq.

Naliliisoqarpoq, siunnersuut Kalaallit Nunaanni pigisanut aalaakkaasunut akit pilersinneqartarnerinut neqerooruteqartitsisarnernullu pioreersunut sunnuteqassanngitsoq.

Maanna pigisanik aalaakkaasunik pigisaqartut siunissami pigisaminnik aalaakkaasunik qaffasinnerusunik iluanaaruteqarlutik tunisisinnaanissamut imaluunniit attartortitsisinnaanissamut periarfissaminnik annaasaqarnissaat pisusaaanngitsutut oqaatigineqarsinnaanngilaq.

Naliliineq malillugu Kalaallit Nunaanni pigisanut aalaakkaasunut piginnaatitaanermik pisinissaq imaluunniit atuisinnaatitaanissaq, imaluunniit Kalaallit Nunaanni nunaminertamik atuisinnaatitaanissaq pillugu suliat, Naalakkersuisoqarfimmit akuersissummik pisariaqartitsiffiusut killeqartuinnarnik amerlassuseqarput, taamaattumillu inuussutissarsiortunut aningaasaqarnikkut allaffissornikkulluunniit annertuunik aningaasartuuteqarfiususnaanatik.

5. Avatangiisinut, pinngortitamut inuillu peqqissusaannut kingunerisinnaasai

Siunnersuut avatangiisinut, pinngortitamut inuillu peqqissusaannut kinguneqassanngitsoq nalilerneqarpoq.

6. Innuttaasunut kingunerisinnaasai

Naliliisoqarpoq siunnersuut Kalaallit Nunaanni pigisanik aalaakkaasunik aalajaatsumik takorlooruminartumillu akileqartitsiinnarnissamut pisiassaqarnissanullu iluaqutaasinnaasoq aammalu innuttaasut aalajangersimasumik najugaqartut pigisamik aalaakkaasumik piginnilernissamut imaluunniit attartornissamut periarfissaasa, avataaneersut pigisanik aalaakkaasunik pisiortornerisa imaluunniit attartornerisa malitsigisaanik killilerneqannginnissaannut imaluunniit akisunerulersinneqannginnissaannut iluaqutaassasoq.

7. Kingunerisinnaasai pingaaruteqartut allat

Siunnersuut allatigut pingaarutilimmik allannguuteqassanngitsoq nalilerneqarpoq.

8. Oqartussanut peqatigiiffinnullu il.il. tusarniaaneq

Siunnersuummi matumani 2025-mut Ilassutitut aningaasaliissutitut inatsimmi, suliassaqarfimmut 70-72-mut, Ineqarnermut Attaveqaasersuutinullu Naalakkersuisoqarfik, oqaasertaliussaq nr. 4-mi erseqqissaanerit aalajangersimasut iluarsillugit ingerlateqqinneqarput. Oqaasertaliussaq Inatsisartut Aningaasaqarnermut Akileraartarnermullu Ataatsimiititaliaanit ulloq 31. januar 2025 ataatsimiinnermi akuerineqarpoq.

Aammattaaq nunanit allamiut Kalaallit Nunaanni pigisanik aalaakkaasunik atuisinnaatitaalernissamut periarfissaannik maleruagassiineq inatsisissatut siunnersuummi matumani ilaatinneqarpoq. Nunanit allamiut atuisinnaatitaalernissamut periarfissaqarnerannik maleruagassiineq oqaasertaliussaq nr. 4-mi ilaatinneqanngilaq. Taamaattumik nunanit allamiut pigisanut aalaakkaasunut atuisinnaatitaalernissamut periarfissaqarnerannik inatsisissatut siunnersuummi maleruagassiineq tusarniaaffigineqartunut, takuuk ilanngussaq 1, saqqummiunneqarsimanngilaq.

Suliassaqarfimmut 70-72 Ineqarnermut Attaveqaasersuutinullu Naalakkersuisoqarfik, oqaasertaliussaq nr. 4-mut siunnersuutip suliarineqarneranut ilaatillugu Naalakkersuisut Siulittaasuata Naalakkersuisoqarfia, Aningaasaqarnermut Akileraartarnermullu Naalakkersuisoqarfik, Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoqarfik, Naalagaaffinngornissamut Nunanullu Allanut Naalakkersuisoqarfik kiisalu Aalisarnermut Piniarnermullu Naalakkersuisoqarfik tusarniarneqarput.

Aammattaaq Suliassaqarfimmut 70-72 Ineqarnermut Attaveqaasersuutinullu Naalakkersuisoqarfik, oqaasertaliussaq nr. 4-mut siunnersuut Grønlandsbanken A/S-imut,

Bankivik A/S-imut, Realkreditinstitut DLR Kredit A/S-imut, Realkreditinstitut Nykredit A/S-imut kiisalu Finanstilsynet-imut saqqummiunneqarpoq oqaloqatigiissutigineqarlunilu.

Siunnersuut piffissami 2025-mi juunip 4-anit, juulip 3-ata tungaanut siunnersuut tamanut tusarniutigalugu Naalakkersuisut tusarniaavianni saqqummiunneqarluni.

Tusarniaaffigineqartunut ukununga tusarniutigineqarpoq:

- Naalakkersuisut Siulittaasuata Naalakkersuisoqarfia
- Aningaasaqarnermut Akileraartarnermullu Naalakkersuisoqarfik
- Inuussutissarsiornermut, Aatsitassanut, Nukissiutitut, Inatsisit Atuutsinneqarnerannut Naligiissitaanermullu Naalakkersuisoqarfik
- Nunanut Allanut Ilisimatusarnermullu Naalakkersuisoqarfik
- Ilinniartitaanermut, Kultureqarmut, Timersornermut Ilageeqarnermullu Naalakkersuisoqarfik
- Aalisarnermut, Piniarnermut, Nunalerinermit Imminullu Pilersornermut Naalakkersuisoqarfik
- Meeqqanut, Inuusuttunut Ilaqutariinnullu Naalakkersuisoqarfik
- Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisoqarfik
- Pinngortitamut Avatangiisinullu Naalakkersuisoqarfik
- Peqqissutsimut Inunnnullu Innarluutilinnut Naalakkersuisoqarfik
- Avannaata Kommunia
- Kommune Qeqertalik
- Qeqqata Kommunia
- Kommuneqarfik Sermersooq
- Kommune Kujalleq
- Kalaallit Nunaanni Naalagaaffiup Sinnisua
- Aningaasaqarnermut Nakkutilliisoqarfik
- Kalaallit Nunaanni Politiit
- Nunatta Eqqartuussivia
- Ineqarneq pillugu Maalaaruteqartarfik – Atuisartoqarnermut
- Unammilleqatigiinnermullu Aqutsisoqarfik
- Asiaq
- Nukissiorfiit
- Greenland Airports
- INI A/S
- Illuut A/S (info@illuut.gl)
- Iserit A/S
- GrønlandsBANKEN
- Bankivik
- Lynges.gl

- Igdlo.gl
- Netbolig.gl
- Nykredit Realkredit A/S aamma Totalkredit A/S
- DLR Kredit
- KANUNUPE
- Nusuka
- Sulisitsisut
- SIK
- PK-mi siulittaasoq
- AK
- IMAK
- NPK
- ASG

Tusarniaanermi akissuteqaatini tiguneqartuni immikkoortut pingaarnerit ilanngussaq 2-mi pingaarnersiorneqarput oqaaseqarfigineqarlutillu.

Siunnersuummi aalajangersakkanut ataasiakkaanut nassuiaatit*§ 1-imut***Imm. 1-mut**

Siunnersuutigineqarpoq, Kalaallit Nunaanni pigisanut aalaakkaasunut piginnaatitaanermik pisinerup imaluunniit atuisinnaatitaalerup inatsisinik tunngaveqarnissaanik atuuttussaatinneqarnissaanullu piumasaqaateqarnissamut oqaasertaliussami inatsisitigut tunngavissamik tamanut atuuttumik atuutsitsisoqalissasoq. Tamatuma kingorna taamaallaat oqaasertaliussami aalajangersimasumik inatsisitigut tunngaveqarneq, imaluunniit Naalakkersuisuniit akuersisummik pigisaqarneq takutinneqarsinnaappat, Kalaallit Nunaanni pigisanut aalaakkaasunut piginnaatitaanermik pisineq imaluunniit atuisinnaatitaalerneq inatsisinik tunngaveqartutut atuuttussatullu isigineqarsinnaavoq.

Atuisinnaatitaanertut isigineqarpoq, Kalaallit Nunaanni pigisamik aalaakkaasumik atuinissamut isumaqatigiissut sunaluunniit. Atuisinnaatitaanermut akiliummik akiliisoqarnersoq akiliisoqannginnersorluunniit apeqqutaanani tamanna atuuppoq. Aalajangersakkami nammineq aamma inuussutissarsiornermik siunertalimmik atuisinnaatitaaneq aammalu ilanngullugu najugaqarfittut atuisinnaatitaaneq, pineqartunut ilaatinneqarput.

Nammineerluni atorunnaarsitsinerni, pinngitsaaliilluni atorunnaarsitsinerni akiliisinnaajunnaarnernillu suliarineqarnerani piginnittunik, § 1, imm. 1-imi ilaasunik nikitsitsisoqartanngilaq. Atorunnaarsitsisoq akiligassanilluunniit iluarsisoq aqutsisutut inississaaq, aammalu pigisat nalillit tuniniarneqarnerinik isumaginnissalluni. Tunisinermi pisisup (tunisisullu) Inatsisartut inatsisaanni matumani (taamatullu inatsisini attuumassutilinni allani) maleruagassat isiginiassavaat.

Toqusut qimataannik pisortatigoortumik nuussisoqarnerani, § 1, imm. 1-imi ilaasunut pigisanik nuussisoqassanngilaq. Pigisanik nuussisarnermut eqqartuussiviup pigisat nalillit tuniniassavai. Tunisinermi pisisup /aamma pigisanik nuussisarnermut eqqartuussiviup) Inatsisartut inatsisaanni matumani (taamatullu inatsisini attuumassutilinni allani) maleruagassat isiginiassavaat.

Imm. 2-mut

Kisiannili siunnersuutigineqarpoq, aningaaserivinnut il.il., siunnersuummi § 5-imut ilaatinneqartunut piginneqataassutinik pisinerit ilaatinneqassanngitsut. Tamatuma kingunerisaanik assersuutigalugu Grønlandsbanken A/S-imi piginneqataassutinik pisineq Naalakkersuisunit akuerineqartussaassanngilaq.

Imm. 3-mut

Siunnersuutigineqarpoq, siunnersuummi Kalaallit Nunaanni pigisamik aalaakkaasumik pisisinnaanissamut killilersuutit aamma Kalaallit Nunaanni nunaminertamik atuisinnaanermut qinnuteqaatinut atuutsinneqassasut.

Siunnersuummi aalajangersakkat, tassungalu ilanngullugit §§ 3-8 aamma § 10, kikkut Naalakkersuisunit akuersissutitaqanngitsumik Kalaallit Nunaanni pigisamik aalaakkaasunik pisisinnaanerinit tunngasut, taamatuttaaq Kalaallit Nunaanni nunaminertamik atuisinnaatitaaneq pillugu qinnuteqaatinut atorneqartassasut.

*§ 2-mut***Imm. 1-mut**

Inatsisartut inatsisaannut siunnersuut inuup pigisamik aalaakkaasumik nammineerluni inigisassamik atuisinnaatitaanermik pisineranut atuutissanngilaq. Inuk Naalakkersuisunut akuersissummik qinnuteqaqqaanngikkaluarluni inissiamik nammineerluni atugassamik attartornissamut periarfissaqarpoq.

Inatsisartut inatsisaannut siunnersuut inuit imaluunniit suliffeqarfiit atuisinnaatitaanermik atuukkallartussamik pisinerannut atuutinngilaq. Aalajangersakkami assersuutigalugu pineqartut tassaapput bed and breakfast-itut attartortitsineq, airbnb aqutigalugu sivikitsumik attartortitsineq, tikeraanut angerlarsimaffik, tikeraanut ineeqqat, motel-it, cabin-it, akunnittarfik imaluunniit assigisaat. Nallinginnaasumik atuisinnaatitaaneq piffissami killilimmi taamaallaat atuuttussaasoq atuisinnaatitaanermut isumaqatigiisummi allassimassaaq, imaluunniit atuisinnaatitaaneq taamaallaat piffissami sivikinnerusumi killilikkami aammalu atuisinnaatitaanertut ataavartussatut piffissamiluunniit sivisunerusumi atuuttussatut naatsorsuutigineqanngitsaq ersarissumik allassimassalluni.

Naalakkersuisut siunnersuummi § 9, imm. 4 naapertorlugu pigisamut aalaakkaasumut atuigallarnissamut maleruagassamik aalajangersaasinnaapput.

Imm. 2-mut

Siunnersuummi aalajangersakkat Namminersorlutik Oqartussanut, Savalimmiuni Namminersornerullutik Oqartussanut, danskit naalagaaffiannut imaluunniit Kalaallit Nunaanni kommuninut atuutissanngitsut erseqqissaatigineqarpoq.

Namminersorlutik Oqartussanut kommuninullu Naalakkersuisut, Inatsisartut, Kalaallit Nunaanni kommunit taakkunanilu sullissiviit ilaatinneqarput.

Oqartussat sullissiviillu sorliit ”pisortat ingerlatsinerannut” ilaatinneqassanersut aalajangersaanermi, sullissiviit aaqqissuussaanneri inissisimanerannik naliliineq

tunnigavigalugu pingaartitsisoqassaaq, aammalu taamaallaat aammattaaq sullissiviup atuuffiit suut suliarisarnera tamanna nalornilersitsilluni pisoqartillugu.

Kalaallit Nunaanni kommunit Kalaallit Nunaata nunap immikkoortuinut kommuneqarfinnullu aggorneqarnera pillugu Inatsisartut inatsisaanni aalajangersarneqarput.

Aalajangersakkami danskit naalagaaffiat ilaatinneqanngilaq. Taaguut naalagaaffik atituumik atornerqarpoq aammalu ilaatigut ministereqarfiit pineqartut taakkualu ataanni oqartussat pineqartunut ilaatinneqarlutik. Taaguummi Danmarkimi nunap immikkoortui kommunillu pineqartunut ilaatinneqanngillat.

Imm. 3-mut

Erseqqissarneqarpoq Kalaallit Nunaanni pigisamut aalaakkaasumut pisinnaatitaanermik pisinerit imaluunniit atuisinnaatitaanerit imaluunniit Kalaallit Nunaanni nunaminertanut atuisinnaatitaanerit, Danmarkip aamma Amerikas Forenede Stater naalakkersuisuisa akornanni Kalaallit Nunaanni illersornissaq pillugu isumaqatigiisummi 27. april 1951-imeersumi kingusinnerusukkut allannguuteqartartumi pineqartunut ilaatinneqartunik siunertaqartut, siunnersuummi aalajangersakkami pineqartunut ilaatinneqanngitsut.

Imm. 4-mut

Erseqqissarneqarpoq, Kalaallit Nunaanni sakkutooqarfik (Pituffik), Kalaallit Nunaanni illersornissaq pillugu Danmarkip aamma Amerikas Forenede Stater naalakkersuisuisa akornanni isumaqatigiisut 27. april 1951-imeersoq kingusinnerusukkut allannguuteqartartoq naapertorlugu pilersinneqartoq, siunnersuummi aalajangersakkami pineqartunut ilaatinneqanngitsut.

§ 3-mut

Siunnersuutigineqarpoq, inuit danskisut innuttaassusillit Kalaallit Nunaanni pigisanut aalaakkaasumut piginnaatitaanermik pisisinnaasut imaluunniit atuisinnaatitaalersinnaasut. Tamatuma kingunerisaanik danskisut innuttaassusillit maanna inatsisitigut inissisimaneq assigalugu Kalaallit Nunaanni pigisanut aalaakkaasunut piginnaatitaanermik pisisinnaapput imaluunniit atuisinnaatitaalersinnaallutik.

§ 4-mut

Siunnersuutigineqarpoq, inuit danskisut innuttaassuseqanngitsut ukiut kingullerni marlunni Kalaallit Nunaanni aalajangersimasumik najugaqarsimagunik, inuillu nalunaarsorsimaffianni nalunaarsorsimagunik aammalu Kalaallit Nunaanni tamakkiisumik akileraartussaasimagunik pigisanut aalaakkaasunut piginnaatitaanermik pisisinnaasut imaluunniit atuisinnaatitaalersinnaasut. Kalaallit Nunaannut attuumassuteqarnissamut piumasaqaat

taamaalilluni qaammatini qaangiuttuni 24-ni Kalaallit Nunaanni najugaqarsimanermi, kiisalu Kalaallit Nunaanni tamakkiisumik akileraartussaataasimanermi naammassineqarsimassaaq.

Ukiunut marlunnut piffissaliussaq piffissamit, inuup Kalaallit Nunaanni aalajangersimasumik najugaqartutut inuit nalunaarsorsimaffiannut nalunaarutigineqarneraniit naatsorsorneqassaaq. Ukiuni marlunni Kalaallit Nunaanni aalajangersimasumik najugaqarnissamut inuillu allattorsimaffianni nalunaarsorsimanissamut, kiisalu Kalaallit Nunaanni tamakkiisumik akileraartussaataaannissamut piumasaqaat kingusinnerpaamik piffissami, Kalaallit Nunaanni pigisanut aalaakkaasunut piginnaatitaanermik pisinissaq imaluunniit atuisinnaatitaalernissaq pillugu inatsisitigut pituttuiffiusumik isumaqatigiissuteqarneranni, naammassineqarsimassapput. Isumaqatigiissummi piumasaqaataasinnaasut atugassarititaasinnaasulluunniit, imaluunniit piffissaq pigisamik aalaakkaasumik tigusiffiusoq isumaqartussaannngillat.

Suliffeqarfiit arlallit peqatigiillutik pigisamut aalaakkaasumut piginnaatitaanissaq imaluunniit atuisinnaatitaanissaq pillugu isumaqatigiissuteqassappata, ukiuni marlunni Kalaallit Nunaanni aalajangersimasumik najugaqarnissamut, inuillu allattorsimaffianni nalunaarsorneqarsimanissamut, kiisalu Kalaallit Nunaanni tamakkiisumik akileraartussaataaannissamut piumasaqaat piffissami, Kalaallit Nunaanni pigisanut nalilinnut piginnaatitaanermik pissarsinissaq imaluunniit atuisinnaatitaalernissaq pillugu inatsisitigut pituttuiffiusumik isumaqatigiissuteqarneranni inunnit tamarmiusunit naammassineqarsimassapput.

§ 5-mut

Siunnersuutigineqarpoq, aningaaseriviit, realkredit-imik taarsigassarsititsisarfiit, ingerlatseqatigiiffiit aningaasaliissutiniq aqutsisartut, sillimmasiisarfiit, taakkunungalugu ilanngullugit inuunermut sillimmasiisarfiit kiisalu soraarnerussutisiassanut aningaasaateqarfiit aamma suliffeqarfiit soraarnerussutisiassanik katersuisarfii il.il., Danmarkimi, Kalallit Nunaanni imaluunniit Savalimmiuni najugaqartut, aammalu Finanstilsynet-imit imaluunniit Tryktingareftirlitið-imit nakkutigineqartut, Kalaallit Nunaanni pigisanut aalaakkaasunut piginnaatitaaffimmik atuisinnaatitaanermilluunniit pisisinnaatitaassasut, kiisalu nunaminertanik atuisinnaatitaassasut.

§ 6-imut

Siunnersuutigineqarpoq, inuit siunnersuummi §§ 3-4 naapertorlugit Kalaallit Nunaanni pigisanut aalaakkaasunut piginnaatitaanermik pisisinnaatitaasut imaluunniit atuisinnaatitaasut taamatuttaaq ingerlatseqatigiiffinnut aningaasaliiffiusunut, Kalaallit Nunaanni angerlarsimaffeqartunut aningaasaliissuteqarlutik piginnittuusinnaassasut, aammalu

ingerlatseqatigiiffik aningaasaliiffiusoq Kalaallit Nunaanni pigisanut aalaakkaasunut piginnaatitaanermik pisitissinnaassagaat imaluunniit atuisinnaatitaalersissinnaassagaat.

Ingerlatseqatigiiffiit aningaasaliiffiusut aktiat piginneqatigiiffiillu pillugit Inatsimmut (ingerlatseqatigiiffinnut inatsit) atasutut paasineqassapput, taakkunanilu ingerlatseqatigiiffiit piginneqatigiiffiusut aktianillu piginneqatigiiffiusut ilaatinneqarput.

Siunnersuutigineqarpoq, inuit, piffissami ingerlatseqatigiiffiup aningaasaliiffiusup Kalaallit Nunaanni pigisamut aalaakkaasumut piginnaatitaanermik pisisinnaalernerani imaluunniit atuisinnaatitaalerneranni ingerlatseqatigiiffimmi aningaasaatinik tamanik pigisaqassasut, aammalu ingerlatseqatigiiffimmi taasisinnaatitaanernik tamanik atuisinnaassasut.

Inuit aningaasaatinik pigisaqassapput toqqaannartumillu taasisinnaatitaassallutik, aammalu CVR-imi ingerlatseqatigiiffimmi aningaasaliiffiusumik inatsisit malillugit piviusumillu 100 %-inik piginnittutut nalunaarsorsimassallutik. Siunnersuummi ingerlatseqatigiiffinni allani aningaasaatit aqutugalugit toqqaannangitsumik piginnittuunissaq inerteqqutigineqarpoq. Taamaalluni ingerlatseqatigiiffiup aningaasaliiffiusup Kalaallit Nunaanni pigisanut aalaakkaasunut piginnaatitaanermik pisisinnaaneranut imaluunniit atuisinnaatitaalernerannut atatillugu sapinngisamik annertunerpaamik ersarissumik pissusilersortoqarnissaa pingaartinneqarpoq.

Siunnersuutip kingunerisaanik ingerlatseqatigiiffik Kalaallit Nunaata avataani angerlarsimaffeqarsimappat, ingerlatseqatigiiffik Naalakkersuisut siumoortumik allakkatigut akuersissuteqarsimatinnagit Kalaallit Nunaanni pigisanut aalaakkaasunut piginnaatitaanermik pisisinnaanngilaq imaluunniit atuisinnaatitaalersinnaanani. Ingerlatseqatigiiffimmi aningaasaatit tamarmik inunnit, siunnersuummi §§ 3-4-mi ilaatinneqartunit pigineqaraluarpata tamarmillu taasisinnaatitaagalarpata tamanna atuutissaaq.

Aningaasaatit, inunnit, siunnersuummi §§ 3-4 naapertorlugu Kalaallit Nunaanni pigisanut aalaakkaasunut piginnaatitaanermik pisisinnaasunit imaluunniit atuisinnaatitaalersinnaasunit pigineqartut nalinginnaasumik qularnaveeqqusiullugit taarsigassarsinermut atorneqarsinnaapput. Inunnut imaluunniit inatsisitigut pisinnaatitaallutillu pisussaataasunut, siunnersuummi §§ 3-4-mi pineqartunut ilaatinneqanngitsunut, iluaqutaasumik qularnaveeqqusiussaqarluni taarsigassarsinermi, siunnersuummi § 9, tak. § 1, imm. 2, atuutissaaq. Taamaattoq qularnaveeqqusiussaqarluni taarsigassarsineq isumaqatigiisummi avaqqutaarisarneq pillugu siunnersuummi § 13-imi pineqartunut ilaasumi, ilaatinneqaqqusaanngilaq.

Aningaasaatit tunngavigalugit taasisinnaatitaanerit, inunnit, siunnersuummi §§ 3-4 naapertorlugu Kalaallit Nunaanni pigisanut aalaakkaasunut piginnaatitaanermik pisisinnaasunit imaluunniit atuisinnaatitaalersinnaasunit pineqartut

qularnaveeqquusiissutigineqarsinnaanngillat tunniunneqarsinnaatilluunniit. Taamatuttaaq taasisinnaatitaaneq piginnaatitsissuteqarnikkut atorneqarsinnaanngilaq.

§ 7-imut

Siunnersuutigineqarpoq, inuit suliffeqarfiillu, aalisarnermut, aatsitassarsiornermut, najukkani aatsitassarsiornermut, aatsitassarsiorneq pillugu, takornariaqarnermut kiisalu sermip erngullu niuernikkut iluaqutigineqarnissaat inatsisit atuuttut naapertorlugit Naalakkersuisut akuersissutaat tunngavigalugu ingerlatsisut pigisanut aalaakkaasunut, suliffeqarfimmut ilaasussanik piginnaatitaanermik pisinissamut imaluunniit atuisinnaalertussamut periarfissaqassasut.

Aalajangersakkami pigisanut aalaakkaasunut, niuernermut tunngaveqarnernik niueqateqarnermillu naliliinerit nalinginnaasut tunngavigalugit suliffeqarfimmut attuumassuteqartunut piginnaatitaanermik pisisarnerit imaluunniit atuisinnaatitaalertarnerit pineqarput. Taakku saniatigut pigisanut aalaakkaasunut piginnaatitaanermik pisisarnerit imaluunniit atuisinnaatitaalertarnerit allat aalajangersakkamut ilaatinneqanngillat. Assersuutigalugu suliffeqarfiup aatsitassarsior tup pigisamut aalaakkaasumut, inuussutissarsiuutigalugu attartortitsinissaq siunertaralugu piginnaatitaanermik pisisinnaanera imaluunniit atuisinnaatitaalersinnaanera aalajangersakkamut ilaatinneqanngilaq.

§ 8-mut

Siunnersuutigineqarpoq, kalaallit peqatigiiffii soqutigisaqaqatigiiffiilu, soorlu SIK, KNAPK, GE aamma Kræftens Bekæmpelse, Naalakkersuisunit akuersissummik piniaqqaanngikkaluarlutik Kalaallit Nunaanni pigisamut aalaakkaasumut piginnaatitsissummik atuisinnaatitaanermilluunniit, aamma Kalaallit Nunaanni nunaminertanik atuisinnaatitaanermik pissarsisinnaassasut.

Peqatigiiffiit soqutigisaqaqatigiiffiilluunniit, suliffeqarfittut inuussutissarsiorfittut immikkoortut inissisimassanngillat. Peqatigiiffiit soqutigisaqaqatigiiffiilluunniit ukiuni marlunni kingullerni sivisunerusumiluunniit Kalaallit Nunaanni angerlarsimaffeqartutut najugaqartutullu CVR-iminni nalunaarsorsimassapput.

Ukiunut marlunnut piffissaliineq piffissamit, peqatigiiffiup soqutigisaqaqatigiiffiilluunniit CVR-iminnik, Kalaallit Nunaanni angerlarsimaffeqartutut najugaqartutullu allasimaffigisaanik nalunaarsuititsinerannit naatsorsorneqassaaq. CVR-ip nalunaarsorsimanissaanut piumasaqaat kingusinnerpaamik piffissami, Kalallit Nunaanni pigisamik aalaakkaasumik nunaminertanilluunniit piginnaatitaaffimmik atuisinnaatitaanermilluunniit pisineq pillugu inatsisitigut pituttuiffiusumik isumaqatigiissuteqarnermi naammassineqarsimassaaq. Isumaqatigiissummi piumasaqaataasinnaasut atugassarititaasinnaasullu, imaluunniit piffissaq pigisamik aalaakkaasumik nunaminertamilluunniit tigusiffiusoq isumaqartinneqanngillat.

Peqatigiiffiit soqutigisaqaqatigiiffiilluunniit arlallit pigisamut aalaakkaasumut nunaminertamulluunniit piginnaatitaaffimmik atuisinnaatitaanermilluunniit isumaqatigiissuteqarfigineqarpata, CVR-ip nalunaarsorsimanissaanut piumasaqaat kingusinnerpaamik piffissami, Kalallit Nunaanni pigisamik aalaakkaasumik nunaminertanilluunniit piginnaatitaaffimmik atuisinnaatitaanermilluunniit pisineq pillugu inatsisitigut pituttuiffiusumik isumaqatigiissuteqarnermi peqatigiiffinnit soqutigisaqaqatigiiffinnillu tamanit naammassineqarsimassaaq.

§ 9-imut

Imm. 1-imut

Inuit suliffeqarfiillu, siunnersuummi §§ 3-8-mi piumasaqaatinik naammassinnissimanngitsut Kalaallit Nunaanni pigisamik aalaakkaasumik pisinissamut Naalakkersuisunut qinnuteqarsinnaapput.

Allakkatigut qinnuteqaat pisiassatut eqqarsaatigineqartumut paasissutissanik, tamatumunngalu piumasaqaatinik ilaqartillugu Naalakkersuisunut nassiunneqassaaq.

Siunnersuummi Naalakkersuisut sulianik suliaqarnissaannut, aammalu Kalaallit Nunaanni pigisamik aalaakkaasumik pisinissamut akuersissuteqartoqarnissaanik qinnuteqaatinut aalajangiinissaannut tunngavissat sukumiisut eqqarsaatigisassalluunniit allassimanngillat.

Imm. 2-mut.

Allakkianik paasissutissanillu, qinnuteqaatip nalilersornissaanut atugassanik qinnuteqartoq saqqummiusseqqullugu Naalakkersuisut peqqusinnaavaat.

Aalajangiisoqannginnerani suliassap naammattumik paasissutissiivigineqarsimanissaa, Naalakkersuisut aallaaviatigut akisussaaffigaat. Tamanna pisortat ingerlatsinerannut inatsisini tunngaviusutut tunngaviuvoq. Tamanna inatsimmi aalajangersagaanngilaq, kisianni nalinginnaasumik pisortat ingerlatsinerannut inatsisini tunngavissatut takussutissaalluni.

Imm. 2-mut siunnersuummi erseqqissarneqarpoq, qinnuteqartoq suliassap paasissutissanik pissarsiviginissaanut peqataanissamut pisussaaffeqartoq. Qinnuteqartup allakkiaat imaluunniit paasissutissat Naalakkersuisut ujartugaat saqqummiutinngippagit, Naalakkersuisut tunngavissat pigineqartut tunngavigalugit aalajangiisinnaapput.

Pigisamik aalaakkaasumik pisinissamut siunertaasoq, aningaasaqarnikkut sunniutaasussat aammalu najukkami pigisanut niuerfimmi sunniinissaaq, nalinginnaasumik nalilersorneqartarput. Nalinginnaasumik niuernikkut ingerlatsinissakkullu naliliisoqarnersoq, pigisamik aalaakkaasumik pigisaqalernissamut akuersissummik qinnuteqaammut tunngavissiisinnaasumik, ilaatinneqassaaq.

Pigisamik aalaakkaasumik nutaamik sanaartormermik kinguneqartussamik qinnuteqarnermi, suliassaq najukkami suliffeqarnermut, illuliornermik inuussutissarsiornermi pisinnaasanik atorluaasoqassanersoq kiisalu pigisamik aalaakkaasumik sanaartormermut akigititat, suliassamut qanoq sunnuteqarsinnaanersut, toqartussaannersoq Naalakkersuisut naliliinerani aammattaaq ilaatinneqarsinnaapput.

Aamma Naalakkersuisut allaffissornikkut sulinerminni Kalaallit Nunaata naalagaaffeqatigiinnerup iluani suleqatigiinnerit, nunat akornanni innuttaasut suleqatigiinneri, kiisalu nunani tamalaani pisussaaffiit, taamatullu Kalaallit Nunaanni nunami namminermi aningaasaqarnikkut nunamilu pilersarusiornikkut soqutigisat eqqarsaatigineqarnissaat pingaartissinnaavaat.

Imm. 3-mut

Kalaallit Nunaanni pigisamik aalaakkaasumik pisinissamut akuersissut immikkut ittunik atugassaqaartitsiffiusinnaavoq piumasaqaateqarfiusinnaallunilu, taamatullu aamma piffissamut killiliiffiusinnaavoq. Tamatumunnga qinnuteqaat aalajangersimasoq, taamatullu atugassarititaasut piumasaqaatillu suut Naalakkersuisunit pingaartinneqarneri apeqqutaatinneqassapput.

Assersuutigalugu nunanit allaneersut illunik attartortittakkanik inissiertalinnik pisinissaannut akuersissuteqartoqassappat, pisineq assersuutigalugu illup attartortittakkatut allanngortinnagu atorneqarnissaa, aammalu inissianut nammineerluni pigisassanut allanngortinneqarsinnaannginnissaa piumasaqaatigineqarsinnaavoq. Assersuutigalugu akuersissummi aamma pisisup najugaqartussaataaannissaa piumasarineqarsinnaavoq. Pisisoq, Kalaallit Nunaanni pigisamik aalaakkaasumik pisinnaatitaasoq ingerlatseqatigiiffiuppat aningaasaliiffiusoq, imaluunniit suliffeqarfiuppat alla, akuersissummi assersuutigalugu piginnittut pisortalluunniit allanngortinneqannginnissaa, imaluunniit suliffeqarfiup siunertaata allanngortinneqannginnissaa piumasaqaatigineqarsinnaavoq.

Kiisalu pisisup atugassarititaasunik piumasaqaatinillu unioqqutitsinerani, imaluunniit akuersissutip piffissalikkap naanerani Kalaallit Nunaanni pigisamik aalaakkaasumik tunisinissamut pisussaaffilerneqarnissaanut piumasaqaammik aalajangersaasoqarsinnaavoq.

Imm. 4-mut

Aalajangersagaq siunnersuummi § 2, imm. 1-mut atasuuvoq. § 2, imm. 1-mi inuit inissiamik nammineq atugassatut attartornissaannut, kiisalu inunnut suliffeqarfinnullu isumaqatigiissuteqartoqarnerani pigisamut aalaakkaasumut atuisinnaatitaagallarnissaaq pillugu isumaqatigiissutit ilaatinneqanngillat. § 2, imm. 1-mut siunnersuummi atuisinnaatitaagallarnissaaq ersarissumik nassuiarlugu aalajangersaasoqanngilaq. Suliaqarnermi tamanna pisariaqartinneqartoq paasinarsissappat, Naalakkersuisut maleruagassanik, ersarissumik atuisinnaatitaagallarnermut nassuiaaviummik, aalajangersaassapput.

Maleruagassanik aalajangersaanermi, siunnersuummi innuttaasut aalajangersimasumik najugaqartut pigisamik nalilimmik piginnilernissamut imaluunniit attartornissamut periarfissaannik killiliisoqannginnissaata imaluunniit avataaneersut pigisanut aalaakkaasunut pisinnaatitaaffeqalerallernerisa malitsigisaannik akisunerulersitsinnginnissap qulakkeernissaanik siunnersuummi pingaarnertut siunertaasup isumaginissaa, Naalakkersuisut pingaartissavaat.

§ 10-mut

Inatsimmi siunertaasoq eqqarsaatigalugu Kalaallit Nunaanni pigisanut aalaakkaasunut piginnaatitaanermik pisisinnaatitaanerup imaluunniit atuisinnaatitaanerup ilaqutariit akornanni kingornussinikkut, pigisanik avitsinikkut tunissuteqarnikkulluunniit killilerneqarnissaa tunngavissaqartutut isigineqanngilaq.

Kingornussatut isigineqarput kingornussisarnermut inatsisit atuuttut naapertorlugit inatsisit tunngavigalugit kingornussat aammalu testamenti naapertorlugu kingornussat. Pigisat agguarneqarneranni ilaatinneqarput isumaqatigiissut aamma eqqartuussut, katissimallutik aappariit arlaata pigisamut aalaakkaasumut piginnaatitaaffik imaluunniit atuisinnaatitaaneq imaluunniit atuinnissaq kingornutissaneraa aalajangiiffiusoq.

Tunissut nassuiarneqarpoq tassaasoq inummiit inummut allamut ajunngitsorsiassamik akeqanngitsumik tunniussineq. Tamanna isumaqarpoq, tiguisup tunniunneqartup akia tamakkerlugu akilissanngikkaa. Tunissutit aningaasanik naleqartuusinnaapput, soorlu aningaasat, pigisat nalillit imaluunniit pappialat nalillit, kisianni aamma takussutissaanerusutut isikkoqartuusinnaallutik.

Qummut ammallu toraartumik qanigisaasuni ilaatinneqarput inuit tunissummik atugassinneqarnermi nalaani inuusut. Qummut toraartumik qanigisaasutut isigineqarput angajoqqaat, aataakkut aanaakkut il.il. Ammut toraartumik qanigisaasutut isigineqarput qitornat, ernuttat il.il.

§ 11-mut

Pigisanut aalaakkaasunut piginnaatitaalernissaq imaluunniit atuisinnaatitaalernissaq pillugu isumaqatigiissut, siunnersuummik unioqqutitsisoq, atuutissanngilaq.

Isumaqatigiissutinut inatsisitigut atuuttussannginneq isumaqarpoq, isumaqatigiissut illuatuneriinnut akunnermminni pissutsinut imaluunniit allanut tunngasunut inatsisitigut pisussaaffiliinngitsoq. Isumaqatigiissut atuutsinniarneqarsinnaasussaannngilaq imaluunniit

pinngitsaaliisummik atortinniarneqartussaanani. Illuatungeriit imaluunniit allat isumaqatigiisut tunngavigalugu pisinnaatitaaneq tapersorsinnaasussaangilaat. Atuuttussaanginneq aammattaaq isumaqarpoq, pisortani oqartussat isumaqatigiisut isiginiartussaangikkaat aammalu suleqatigiinnermi akuusut taakkua isumaqatigiisuteqartoqarsimanngitsutuut isigissagaat.

Atuuttussaanginnera isumaqatigiisutip atuutilerneraniit atuutilerpoq aammalu tamatuma siunnersuummik matuminnga unioqquitsinerunera, taamaattumillu atuuttussaanginnera qanga paasineqarsimanersoq apeqqutaatinneqarani.

Naalakkersuisut Kalaallit Nunaanni pigisanut aalaakkaasunut piginnaatitaanermik pisinissamut imaluunniit atuisinnaatitaalernissamut akuersissutaat ullormit akuersissutip tunniunneqarfianit atuutilissaaq. Naalakkersuisut allakkatigut akuersissutaata piareernissaa sioqqullugu isumaqatigiisuteqartoqarsimappat isumaqatigiisut atuutissaangilaq, aammalu isumaqatigiisuteqartut akornanni imaluunniit inummut allamut, taakkunungalugu pisortani oqartussaasut ilanngullugit, inatsisit atuuttussaatinneqassanngillat.

§ 12-mut

Imm. 1-imut

Piginnaatitaanernut allakkianik Kalaallit Nunaanni Eqqartuussivimmi nalunaarsorneqartussanngorlugit nalunaarutiginninnermi imaluunniit nunaminertamik atugassinneqarnissaq pillugu qinnuteqarnermi, piginnaatitaanermik piginnittoq qinnuteqartorlu inatsisissatut siunnersuummi §§ 3-8-mi imaluunniit § 10-mi pineqartut piumasaqaatinik naammassinnissimanngippata, akuersissut Naalakkersuisunit allaganngorlugu takutinneqassaaq.

Siunnersuummi §§ 3-8 aamma § 10 malillugit piginnaatitaanermut allakkiamik Kalaallit Nunaanni Eqqartuussivimmi nalunaarsorneqartussanngorlugu nalunaarutiginninnermi imaluunniit nunaminertamik atugassinneqarnissaq pillugu qinnuteqarnermi, piginnaatitaanermik piginnittoq aamma nunaminertamik atugassinneqarnissamik qinnuteqartoq siunnersuummi §§ 3-8-mi piumasaqaatinik naammassinninngitsut aamma § 10-mi pineqartunut ilaangitsut pillugu uppersaasat takutinneqartariaqarpoq. Tamanna nalinginnaasumik passip assilinerani imaluunniit najugaqarnermut uppersaasummi pissaaq.

Imm. 2-mut

Kalaallit Nunaanni pigisamut aalaakkaasumut piginnaatitaanermik pisinermi piginnittuunermut imaluunniit pigisamut aalaakkaasumut atuisinnaatitaanermut uppersaasummik uppersaasammilluunniit allamik Kalaallit Nunaanni Eqqartuussivimmut nalunaarsuititsinissaq pisussaaffiunngilaq. Kisiannili siunnersuutigineqarpoq, ileqqorissaarnissaq eqqarsaatigalugu Kalaallit Nunaanni Eqqartuussivik Kalaallit Nunaanni pigisanut aalaakkaasunut piginnaatitaanermik pisinermik imaluunniit atuisinnaatitaanermik

nalunaarsuititsinissamut uppersaatinik tigusiinermi itigartitsisassasoq, pisinnaatitaasoq allakkiaq malillugu siunnersuummi §§ 3-8-mi piumasaqaatinik naammassinnissimanngippat imaluunniit § 10-mi ilaangippat, imaluunniit siunnersuummi § 9 malillugu akuersissummik peqanngippat.

Imm. 3-mut

Taamatuttaaq siunnersuutigineqarpoq, nunaminertanik atugassiisarnermut oqartussaasut Kalaallit Nunaanni nunaminertanik atuisinnaanermut qinnuteqaatinik suliaqarnermi, qinnuteqartoq siunnersuummi §§ 3-8-mi piumasaqaatinik naammassinnissimanngippat imaluunniit § 10-mi ilaangippat, imaluunniit siunnersuummi § 9 malillugu akuersissummik peqanngippat itigartitsisassasut.

§ 13-mut

Kalaallit Nunaanni pigisanut aalaakkaasunut piginnaatitaanermik pisinissamut imaluunniit atuisinnaatitaalernissamut killilersuutiniq saneqquteriaraluartunik peqartoqarnissaa mattunneqarsinnaanngilaq. Tamanna assersuutigalugu isertortumik akunnermiliuttunik (amerlanertigut atuuttussaaitatut taaneqartartunik), tunngaviusumik siunnersuummi §§ 3-8-mi piumasaqaatinik naammassinnittunik atuinermikkut pisinnaapput.

Tamatamani pissutsinik tamarmiusunik, taakkunungalu soorunami isumaqatigiissutitut tunngaviusunik, akiliisarnernik aningaasalersuisarnernillu, aammalu isumaqatigiissummi illuatungiliuttutut akuusunik, saneqqutsiniartutut ilimagineqartunik aalajangersimasumik naliliinissaq apeqqaatinneqassaaq.

Pigisamut aalaakkaasumut piginnaatitaanermik pisinissamik, tassungalu ilanngullugu inatsisit aqqissuussaaneritut tunngassuteqartut pillugit naliliinermut aningaasaliissutaasut annikinnerinik isiginiagaqarnissaq ilaatinneqarsinnaavoq, tak. Aningaasarsianit akileraarutit pillugit Inatsisartut inatsisaanni tamanna pillugu maleruagassat. Aamma siumoortumik suliaasamik akiliisinnaassutsimillu nalinginnaasumik naliliisoqarsimanera, aammalu nalinginnaasumik toqqissisimanartumillu isumannaassuseqartumik aningaasaliisoqarsimanera uppersarneqarsinnaanersoq naliliinermut ilaatinneqarsinnaavoq.

*§ 14-immut**Imm. 1-immut*

Isumaqatigiissutitut inatsisitigut atuuttussaatisinnginnerup saniatigut siunnersuutigineqarpoq, Inatsisartut inatsisaat uniorlugu Kalaallit Nunaanni pigisanik aalaakkaasunik piginnaatitaaffeqarnermik atuisinnaatitaanermilluunniit imaluunniit Kalaallit Nunaanni nunaminertanik atuisinnaatitaanermik pissarsisoq, imaluunniit § 9, imm. 3-mi naapertorlugu akuersissummi nalunaarutigineqartumi piumasaqaatit uniorlugit iliuuseqartoq akiliisitsinermik pineqaatissinneqarsinnaassasoq.

Siunnersuutip unioqqutinneqarnera pillugu misissuineramik aallartitsinissamik aammalu inatsisissatut siunnersuutip unioqqutinneqarneranut unnerluutiginninnissamik Naalakkersuisunit unnerluussinermut oqartussamut inassuteqarnerannut atatillugu Naalakkersuisut peqatigisaanik akiliisitsinerup naleqquttumik annertussusissaanik nalilersuinertik oqaatigisinnaavaat. Naalakkersuisut taamaaliornerminni ilaatigut suliami akuusunut aningaasaqarnikkut nalillit pingaartissavaat.

Imm. 2-mut

Siunnersuummi § 9, imm. 4 naapertorlugu nalunaarummi maleruagassanik unioqqutitsineq akiliisitsinermik pineqaatissiivigineqarsinnaasoq, aalajangersaanissamut Naalakkersuisut piginnaatinneqarput.

Imm. 3-mut

Aalajangersakkap atuunnerani pinerluttulerinermut inatsisitigut akisussaaffik, pinerluttulerinermut inatsimmi kapitali 5-imi maleruagassanut naapertuuttumik inatsisitigut pisinnaatitaallutillu piginnaatitaasunut tunngatillugu atuutsinneqartussanngorsinnaavoq,

Imm. 4-mut

Siunnersuutigineqarpoq akiliisitsinerit Nunap karsianut tutsinneqassasut.

*§ 15-immut**Imm. 1-mut*

Siunnersuutigineqarpoq Inatsisartut inatsisaat ulloq 1. januaari 2026-mi atuutilissasoq.

Imm. 2-mut

Pigisanut aalaakkaasunut piginnaatitaanermik pisinissaq imaluunniit atuisinnaatitaalernissaq pillugu isumaqatigiissutitut, Inatsisartut inatsisaata atuutilernerata kingorna isumaqatigiissutigineqartunut aammalu nunaminertanik atuisinnaatitaalernissaq pillugu qinnuteqaatinut, Inatsisartut inatsisaata atuutilernerata kingorna tunniunneqartunut, inatsisissamut siunnersuut atuuppoq.

Suliassa qarfirmut 70-72-imut Ineqarnermut Attaveqaasersuutinullu Naalakkersuisoqarfik, oqaasertaliussaq nr. 4, ulloq 31. januar 2025 Inatsisartut Aningaasaqarnermut Akileraartarnermullu Ataatsimiititaliaannit akuerineqartoq, siunnersuutip taarserpaa. Oqaasertaliussaq atuutilernerata saqqummiunneqarnerani atuutilerpoq.

Oqaasertaliussaq ulloq 1. februar 2025 nittartakkami www.nalunaarutit.gl-imi atuutilernera saqqummiunneqarpoq aammalu pigisanik aalaakkaasunik pisinnaatitaanermik pisinissaq pillugu isumaqatigiissutinut, oqaasertaliussap atuutilernerata kingorna isumaqatigiissutigineqartunut aammalu nunaminertanut atuisinnaatitaalnissaq pillugu qinnuteqaatinut, oqaasertaliussap atuutilernerata kingorna tunniunneqartunut, atuulluni. Oqaasertaliussaq Inatsisartut inatsisaata atuutilernissaata tungaanut atuuppoq.

Ilanngussaq 1

**(IA 2025, Suliassaqarfik 70-72, Oqaasertali
ussaq nr. 4)**

Tusarniaaneq pillugu allakkiaq

1. Uunga siunnersuut oqaasertaliussaq nr. 4, Suliassaqarfimmut, 70 - 72 Ineqarnermut Attaveqaasersuutinullu Naalakkersuisoqarfik, piffissami 18. – 22 januaari 2025-mi Naalakkersuisut Siulittaasuata Naalakkersuisoqarfianut, Aningaasaqarnermut Akileraartarnermullu Naalakkersuisoqarfimmut, Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoqarfimmut, Namminersornermut Nunanullu Allanut Naalakkersuisoqarfimmut, kiisalu Aalisarnermut Piniarnermullu Naalakkersuisoqarfimmut tusarniaassutigineqarpoq. Oqaaseqaatit tiguneqartut pisariaqarnerat malillugu ilanngunneqarput.

Nunanit allaniit Kalaallit Nunaanni pigisamik aalaakkaasumik piginnaatitaaffimmik pisisinnaanerannut maleruagassiinissamut siunnersuummut missingiut Grønlandsbanken A/S-imut, Bankivik-mut, DLR-kredit-imut aamma Nykredit-imut kiisalu Finanstilsynet-imut saqqummiunneqarpoq.

2. Nunanit allaniit Kalaallit Nunaanni pigisamik aalaakkaasumik pisisinnaanerannut maleruagassiinermut akerliliissuteqanngilaq. Ataatsimut isigalugu paasissutissiissutigineqarpoq nunanit allaniut Kalaallit Nunaanni pigisamik aalaakkaasumik pisinissamut soqutiginninnerat killeqartoq aammalu ataasiakkaaginnartigut takuneqartartoq.

Tusarniaanermut killigititap naanerani Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoqarfik, Bankivik aamma GrønlandsBANKEN tusarniaanermut akissuteqaatit tiguneqarput.

Tulliuttuni tusarniaanermut akissuteqaatit sinneri issuarneqarput, taakkununga oqaaseqaateqartoqarluni uingasumik allassimasunik.

Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoqarfik ,

Naalakkersuisut qaqugukkut Kalaallit Nunaanni pigisamik aalaakkaasumik pisinissamut imaluunniit Kalaallit Nunaanni nunaminertamut atuisinnaatitaalernissamut akuersissummik

qinnuteqaammut itigartitsisinnaanersut akuersisinnaanersullu imaluunniit itigartitsisassanersut akuersisassanersullu malittarisassanik siunnersuummi aalajangersaasoqanngilaq

Akissut:

Oqaasertaliussamut siunnersuummi Kalaallit Nunaanni pigisamik aalaakkaasumik nunanit allaneersut pisinerinik tunisinerinillu nakkutiginninnissaq paasisimaarinninnissarlu maannakkorpiq qulakkeerneqassaaq. Nunanit allaneersut Kalaallit Nunaanni pigisamik aalaakkaasumik pisinissaanut killiliinissamut pisariaqartitsisoqarluni, pisinnaasut sioqqutsisumik allattorneqarsinnaanngillat.

Siunnersuummi siunertarineqanngilaq pigisamik aalaakkaasumik nunanit allameersumut tunisinerit suulluunniit periarfissaarutsinnissaat. Siunnersuummi imm. 8-imi Naalakkersuisut maleruagassanit nalinginnaasunit immikkut ittumik akuersissuteqarnissamut piginnaatinneqarput. Siunnersuutip siunertaa imm. 8-mut oqaaseqaatini erseqqinnerusumik nassuiarneqarpoq.

Pigisamik aalaakkaasumik pigisaqalernissamut akuersissummik qinnuteqaatip nalilersorneqarnerani, qinnuteqaatit ataasiakkaat ataasiakkaatigut nalilersorneqartassasut, tassanilu ilaatinneqassasut pigisamik aalaakkaasumik pigisaqalernissamut siunertaasooq, aningaasaqarnikkut sunniutaasussat aamma najukkami pigisanut niuerfimmi sunniinissaq, tusarniaanermut akissuteqaatip kingunerisaanik imm. 8-mut nassuiaatini ilanngunneqarpoq. Nalinginnaasumik niuernikkut ingerlatsinikkullu naliliisoqarsimanersoq, pigisamik aalaakkaasumik pigisaqalernissamut akuersissummik qinnuteqarnermut tapersiisussamik, naliliinermi aammattaaq ilaatinneqartussaavoq.

Maleruagassat nalinginnaasut saneqqunneqarnissaannut immikkut ittumik akuersissuteqarnissamut piginnaatitaanerup allaffissornikkut aqunneqarnera, nalinginnaasumik pisortat ingerlatsinerannut inatsisini maleruagassat tunngavigalugit aqunneqartussaavoq. Qinnuteqaatit amerlassusaat apeqqutaatillugu, piffissap aalajangersimasup ingerlareernerani aalajangersimanerusumik allaffissornikkut suleriaasissamik pilersitsisoqarsinnaanera anguniarneqassaaq.

Oqaasertaliussaq maannamuugallartoq 2025-p naanissaata tungaanut atuutissaaq aammalu kingusinnerusukkut Kalaallit Nunaanni pigisamik aalaakkaasumik nunanit allaneersut pisisarnerannut maleruagassiinissamut maleruagassat allannguutissaannik suliaqartoqarsinnaassaaq.

Bankivik

Kalaallit Nunaanni pigisamik aalaakkaasumik piginnilernissamut maleruagassiinissaq pillugu siunnersuut saqqummiunneqartoq pillugu tusarniaanermut akissuteqarnissamut periarfissinneqaratta qujavugut.

Matumuuna oqaaseqaatissagut tunniutissavagut, pingaartumik siunnersuummi § 5-imut, Kalaallit Nunaanni ingerlatseqatigiiffik aningaasaatilik, pigisamik aalaakkaasumik piginnilersinnaanissamut najukkaneersunit 100 %-imik pigineqassasoq piunasaqaateqarfiusumut, tunngatillugu.

Pingaarnertigut oqaaseqaatit aamma siunertaq

Kalaallit Nunaanni pigisanut aalaakkaasunut niuerfimmi akilersuisarnerup aalajaatsuunissaata takorlooruminartuunissaatalu pisariaqartinneqarnera, kiisalu avataaneersut iluanaaruteqarnissamik eqqarsaateqarnissaat aammalu Kalaallit Nunaanni innuttaasut aalajangersimasumik najugaqartut inissiamik pisinissamik ajornakusoortitsilersumik akigititat qaffakkiartorsinnaanerisa pinngitsoortinnissaanik kissaateqarneq, akuersaarparput.

Peqatigisaanik maleruagassiineq Kalaallit Nunaannut naapertuuttumik aningaasaliinissaq pisariaqanngitsumik killiliisariaqanngikkaluarpoq. Aningaasassat nunanit allaneersut nutaanik sullivissaqalersitseqataasinnaapput aammalu inuussutissarsiornermi ineriartortitseqataasinnaallutik, pingaartumik inuussutissarsiutini annertuunik aningaasaliinissamik pisariaqartitsiviusuni. Taamaattumik maleruagassiinerup illuatungaani Kalaallit Nunaanni ineqarnermut niuerfimmik illersuinerup, illuatungaani Kalaallit Nunaata aningaasaqarnikkut ineriartorneranik nukittorsaasinnaasumik nunanit allaniit aningaasaliinissamut periarfissiinerup akornanni oqimaatigiissitsinissaa aalajangiisuulluinnartumik pingaaruteqarpoq.

§ 4-mut oqaaseqaatit – Aningaaseriviit il.il.

Aalajangersakkap taassuma, Bankivik-up Kalaallit Nunaanni niuernermik ingerlatsisinnaanissaanut aalajangiisuulluinnartoq, akuererusupparput pingaaruteqarneralu erseqqissarusullugu.

§ 5-imut oqaaseqaatit – 100 %-imik najukkani aningaasaateqarnissaq pillugu piunasaqaat

Siunnersuummi § 5-imi aalajangersarneqarpoq, Kalaallit Nunaanni ingerlatseqatigiiffiit aningaasaliisartut, ingerlatseqatigiiffiup aningaasaatai tamakkerlugit ingerlatseqatigiiffimmit pigineqarpata aammalu taasisinnaatitaanerit tamarmik inunnit §§ 2-3-mi pineqartunut ilaasunit atorineqarpata, aatsaat pigisanik aalaakkaasunik pigisaqalersinnaasut.

Tamanna isumarput malillugu makkuninnga anigorniagassaqaalersitsivoq:

1. Nunanit allaneersut aningaasaliinissaannik akimmisaartitsineq

Inuit danskisut innuttaassuseqartut imaluunniit Kalaallit Nunaanni ukiuni marlunni najugaqarsimasut akileraartussaataasimasullu tamakkiisumik piginnittuunissaat pillugu piumasaqaatip, aningaasaliisartorpasuit avataaneersut pilersitsinissaat tunuarsimaartilersinnaavai, ilanngullugit najukkani nunanilu tamalaani suliaqartuusut akornanni suleqatigiissinnaanerit. Tamatuma siuariartornissamut periarfissat aammalu Kalaallit Nunaanni inuussutissarsiortuni assigiinngisitaartitsinissaq, annikillisissinnaavai.

2. Suliffeqarfiit pioreersut nalornissuteqarnerat

Ingerlatseqatigiiffik akuleriinnik piginnittoqareersimappat, piginnittoqarnini tamaat allanngortinngikkunikku, ingerlatseqatigiiffiup maleruagassat malillugit pigisamik aalaakkaasumik pigisaqalersinnaajunnaarnissaa imaluunniit pigisami taarsigassarsinnaajunnaarnissaa, aarlerinaateqarpoq. Assersuutigalugu pigisaq qularnaveeqqusiullugu taarsigassarsinissaq

3. Aningaasalersuutissarsinissap killeqarnera

Aningaaseriviit imaluunniit aningaasaliisartut nunanit allaneersut, pigisamik aalaakkaasumik pigisaqarsinnaanngikkunik imaluunniit qularnaveeqqusiussinnaanngikkunik, suliffeqarfinnut aningaasaliinissaq tunuarsimaarfigilersinnaavaat. Tamakkiisumik najukkaneersut piginnittuunissaannik piumasaqaat aporfeqalersitsivoq, aningaasaleerususeqannginnerulersitsinnaalluni aammalu Kalaallit Nunaanni ataatsimoortumik aningaasaatinik neqerooruteqartarneq annikillisissinnaallugu.

Taamaattumik tamatuma eqqarsaatiginissaa pingaaruteqarpoq, tassalu killilersuinerit sukgavallaarpata, aningaasaatinik neqerooruteqartarnerup annikillisinneqarneranik tamanna malitseqarsinnaasoq, tamannalu allanut atatillugu illuliortiternernut ineqarnerullu ineriartortinneqarneranut tunngatillugu akimmisaartitsinnaavoq.

Tamanna siunnersuummi § 6-imi pisimarpasippoq, tassani assersuutigalugu aatsitassarsiornerup takornariartitsisarnerullu iluanni suliaqartussat avataaneersut pilerilersinnissaasa pingaaruteqarnera akuersarneqarmat.

§ 5-ip iluarsinissaanut siunnersuut

Najukkani nakkutiginninnissap eqqarsaatigineqarnera naammassiniarlugu, peqatigisaanillu avataaneersunit aningaasaliinissamut periarfissiiniarluni, ilusiliaq isumaliutersuutigineqarsinnaavoq, tassani assersuutigalugu aningaasaatit aammalu taasisinnaatitaanerit minnerpaamik 50 %-ii (immaqa 2/3) inunnit §§ 2-3-mi pineqartunut ilaasunit pigineqassallutik, piginneqataanerit sinneruttut aningaasaliisartunit avataaneersunit pigineqarsinnaallutik. Tamatumani ingerlatseqatigiiffiit najukkami annertuumik

inissisimatinneqarnissaannik siunertarineqartoq naammassineqarsinnaavoq, peqatigisaanillu nunanit allaneersut aningaasaliisartut peqataasinnaallutik.

Allaanerumik ilusiliineq tassaasinnaavoq akuersissuteqartarnermik aaqqissuussineq, tassani ingerlaseqatigiiffiit aningaasaliisartut killissaq aalajangersimasoq qaangerlugu (assersuutigalugu 50 %) nunanit allaneersunit pigineqartut, Naalakkersuisunit akuerineqarsimasussaallutik. Taamaaliornermi pigisamik aalaakkaasumik pigisaqalernissamut akuersissuteqarnissaq pillugu aalajangiisoqannginnerani, suliassami siunertaasup, aningaasaqarnikkut sunniutaasussat aammalu najukkani illuutitut niuerfimmi sunniinissap ataasiakkaatigut nalilersorneqartarnissai qulakkeerneqarsinnaavoq.

Ilusiliap allaanerup ilaa tassaasinnaavoq § 6-mi aalajangersakkap Kalaallit Nunaanni ingerlatseqatigiiffinnut aningaasaliisartunut, inunnit §§ 2-3-mi pineqartunut ilaasunit 100 %-imik pigineqartuunngitsunut, tamaginnut atuutsinneqarnera. Tassa imaappoq ingerlatseqatigiiffinnut aningaasaliisartunut nunanit allaneersunit pigineqartunut tamaginnut piumasaqaatit assigiit piumasaqaatigineqassat. Assersuutigalugu pigisamik aalaakkaasumik pigisaqalernerneq nalinginnaasumik niuernikkut ingerlatsinikkullu, suliffeqarfimmut pineqartumut attuumassuteqartumik naliliineq aallaavigalugu pissalluni.

Inerniliussineq inassuteqaatillu

1. § 5-ip qasukkartinneqarnera

Inassutigaarput 100 %-imik najukkaneersut piginnittuunissaat pillugu piumasaqaat ilaannakkortumik najukkaneersut piginnittuunissaannik (assersuutigalugu 50 %) taarserneqassasoq imaluunniit taamaanngippat ingerlatseqatigiiffinnut akuleriinnik piginnittoqartunut ataasiakkaatigut § 6-mi akuersissuteqartarnermut suleriaaseqartoqassasoq.

2. Immikkut ittumik akuersissuteqartarnerup paasinartuunissaa

Immikkut ittumik akuersissuteqarnermut imaluunniit aningaasaatinut nunanit allaneersunit akuersissuteqarnissamut atatillugu Naalakkersuisut pissutsit suut pingaartinniarneraat erseqqissarneqartariaqaralarpoq paasiuminarnerulersitsisoqartariaqaralarlunilu, taamaalilluni inatsisitigut isumanaatsuutisineq annertusineqarluni aammalu suliffeqarfiit aningaasaliisartullu siumut takorluuisinnaanerulersinneqarlutik.

3. Nunanit allaneersut aningaasaliinerini iluaqutissartaasut

Maleruagassiinermi aningaasassarsisarnissamik, piginnaasaqartunik avataaneersunillu attaveqarfissanik, Kalaallit Nunaanni attaveqaasersuutunik, inuussutissarsiortunik suliffissaqartitsiniarnermilu ineriartortitsinermut iluaqutaasinnaasunik, kissaateqarneq suli eqqarsaatigineqartariaqaralarpoq.

Naggasiutigalugu oqaaseqaatit

Itisiliisitsisoqarusussappat piareersimavugut, neriutigaarpullu oqaaseqaatit matuma siuliani allassimasut, Kalaallit Nunaanni illuutitut niuerfiup illersorneqarnissaata aammalu nunanit allaneersut aningaasaliinissamut periarfissaqarnissaasa akornanni oqimaaqatigiissitsinissamik qulakkeereqataassasut. Taamatut oqimaaqatigiissitsinissaq naliliinerput malillugu Kalaallit Nunaata ungasissumut aningaasaqarnikkut ineriartortitsinissaanut aalajangiisuulluinnartumik pingaaruteqarpoq.

Akissut:

Oqaasertaliussamut siunnersuummi Kalaallit Nunaanni pigisamik aalaakkaasumik nunanit allaneersut pisinerinik tunisinerinillu nakkutiginninnissaq paasisimaarinninnissarlum maannakkorpiaq qulakkeerneqassaaq. Nunanit allaneersut Kalaallit Nunaanni pigisamik aalaakkaasumik pisinissaannut killiliinissamut pisariaqartitsisoqarluni, pisinnaasut sioqqutsisumik allattorneqarsinnaanngillat.

Siunnersuummi siunertarineqanngilaq pigisamik aalaakkaasumik nunanit allameersumut tunisinerit suulluunniit periarfissaarutsinnissaat. Siunnersuummi imm. 8-imi Naalakkersuisut maleruagassanit nalinginnaasunit immikkut ittumik akuersissuteqarnissamut piginnaatinneqarput. Siunnersuutip siunertaa imm. 8-mut nassuiaatini erseqqinnerusumik nassuiarneqarpoq.

Pigisamik aalaakkaasumik pigisaqalernissamut akuersissummik qinnuteqaatip nalilersorneqarnerani, qinnuteqaatit ataasiakkaat ataasiakkaatigut nalilersorneqartassasut, tassanilu ilaatinneqassasut pigisamik aalaakkaasumik pigisaqalernissamut siunertaasoq, aningaasaqarnikkut sunniutaasussat aamma najukkami pigisanut niuerfimmi sunniinissaq, tusarniaanermut akissuteqaatip kingunerisaanik imm. 8-mut nassuiaatini ilanngunneqarpoq. Nalinginnaasumik niuernikkut ingerlatsinikkullu naliliisoqarsimanersoq, pigisamik aalaakkaasumik pigisaqalernissamut akuersissummik qinnuteqarnermut tapersiisussamik, naliliinermi aammattaaq ilaatinneqartussaavoq.

Maleruagassat nalinginnaasut saneqqunneqarnissaannut immikkut ittumik akuersissuteqarnissamut piginnaatitaanerup allaffissornikkut aqunneqarnera, nalinginnaasumik pisortat ingerlatsinerannut inatsisini maleruagassat tunngavigalugit aqunneqartussaavoq. Qinnuteqaatit amerlassusaat apeqqutaatillugu, piffissap aalajangersimasup ingerlareernerani aalajangersimanerusumik allaffissornikkut suleriaasissamik pilersitsisoqarsinnaanera anguniarneqassaaq.

Oqaasertaliussaq maannamuugallartoq 2025-p naanissaata tungaanut atuutissaaq aammalu kingusinnerusukkut Kalaallit Nunaanni pigisamik aalaakkaasumik nunanit allaneersut pisisarnerannut maleruagassiinissamut maleruagassat allannguutissaannik suliaqartoqarsinnaassaaq.

Grønlandsbanken A/S

GrønlandsBANKEN-ip suliassaqarfimmut 70-72-imut oqaasertaliussamut siunnersuut tiguaa. Siunnersuummut, Kalaallit Nunaanni pigisamik aalaakkaasumik inatsisit malillugit atuuttumillu pigisaqalersinnaanissamut oqaasertaliussami inatsimmi tunngavissaqarnissaq, pisariaqartussaavoq. Tamatuma saniatigut Naalakkersuisunit akuerineqarnikkut pigisamik aalaakkaasumik aamma piginnittoqalersinnaavoq. Aningaaserivik siunnersuummut akuersaartumik inissisimavoq. Annertoorujussuarnik nikerartoqarani aalajaatsumik akigititat ineriartornissaannut, aningaaseriviup naliliinera malillugu, Kalaallit Nunaanni sapinngisamik amerlanerpaat imminnut inissiamik pilersorsinnaanissaat pillugu anguniakkap naammassineqarnissaanut, pisariaqarpoq.

GrønlandsBANKEN isumaqarpoq, Nuummi, aammalu ukiuini tulliuttuni Ilulissani aamma Qaqortumi, timmisartoqarfiup ammarneri, siusinnerusukkut takuneqartartunit annertunerusumik Kalaallit Nunaata soqutigineqalerneranik malitseqartussaasut. Nunani allani takuneqartartut, takornariaqarnerulernerata malitsigisaanik Kalaallit Nunaanni najugaqartuunngitsut amerlanerusut Kalaallit Nunaanni ataavarnerusumik aallaaveqalernissamik kissaateqalersinnaapput.

Taakkua tassaasinnaapput arlaatigut "aasarsiortarfittut" ittumik, sulinngiffeqarnermi inigisassatut atorneqarsinnaasumik, tamatumalu saniatigut AirBnB imaluunniit aqutissat allat atorlugit attartortinneqartartussanik, pisinnerit. Tamanna sumiiffinni allani ineqarnermi niuerfimmi akigititat tatisimaneqalernerannik malitseqartarsimavoq, sulinngiffeqarnermi orninneqartartuni najukkami najugaqartut nammineq atugassaminnik inissiamik pigisaqalernissaasa ajornakusoornerulerneranik imaluunniit ineqarnermut niuerfimmi mattulluinnarneqarnerannik, kinguneqartumik.

Illuutitut niuerfimmi ujartuinerup annertuujunerata malunnareernera akigititallu qaffassissooreernerat, kiisalu nalinginnaasumik inissiat naleqquttut amigaataanerat, eqqarsaatigalugit, aningaaserivik isumaqarpoq siunnersuut isumatusaarnerusoq. Aningaaseriviup immikkoortoq 4 aningaaseriviit pinngitsaaliissummik akitsorterussisoqarneranut il.il. atatillugu illuutip tigunissaanut periarfissaqarnerannik atortussanngortitsinertut isigaa.

Aningaaserivik isumaqarpoq immikkoortoq 7, normu 3, imatut paasineqarsinnaasoq, inuk nunanit allaneersoq, illuutip ataavartumik najugaqarfissatut atorneqartussaanerani, pisinnermi 5 millioner koruuninit annikinnerusumik nalilimmik pigisamik aalaakkaasumik piginnittuuneq ingerlatassaanni kisiartaalluni, Kalaallit Nunaanni ingerlatseqatigiiffimmik piginnittuusinnaasoq. Aalajangersagaq immikkoortoq 8-mi immikkut ittumik akuersissuteqarnissamut piumasaqaatip avaqqutaarneqarnissaanut atorneqarsinnaasoq

ilimanarpoq. Immikkoortuni 2-6-imi piumasaqaatit saneqqunnissaannut immikkut ittumik akuersissuteqarsinnaanerannut periarfissaq, immikkoortoq 8-mi ilanngunneqarpoq. Immikkut ittumik akuersissuteqarnissamut periarfissaqarnissaa pisariaqarpat, pisuni qanoq ittuni immikkut ittumik akuersissuteqarnissamut periarfissaq atorneqarsinnaassanersoq, arlaatigut killissalersorniarneqarnissaa, aningaaseriviup isumaa malillugu ilalernarpoq. Assersuutigalugu ingerlatseqatigiiffiit aningaasaatillit pioreersut, Kalaallit Nunaanni ingerlataqartut, pigisamik nalilinnik pigisaqalerusuttut pillugit tamanna naleqqussinnaavoq.

Tamatuma saniatigut, nunanit allamiut aningaasaliisartut piginnittuullutik, Kalaallit Nunaanni akunnittarfinni inissanik amerlanerusunik sananissamik qinnuteqartoqarluni pisoqarnerani aamma immikkut ittumik akuersissuteqarnissamut periarfissaq atorneqarsinnaavoq.

Immikkoortoq 8-p erseqqissarneqarnera, immikkut ittumik akuersissuteqarnissamut periarfissap siunnersuummi siunertaasunik tunngavissaarutsisinnginnissaanut imaluunniit suliamiit suliamut assigiinngisitaartumik aqunneqalinnginnissaanut, iluaqutaasinnaavoq.

Aningaaseriviup maluginiarpaa, Kalaallit Nunaanni ineqarnermut niuerfimmi suliaqartuusut ilai isumaqartut aningaaseriviit inissiamik pisinissamut aningaasanik taarsigassarsititsisarunnaarsimasut aamma/imaluunniit nammineq inissamik pisinissaq akisunerulersimasoq. Ernialiussap ukiuni kingullerni Nationalbanken-ip ernialiussaata 2021-mi 0 procentimiissimalluni 2024-mi 3 % sinnerlugu annertussuseqalersimanera, GrønlandsBANKEN-ip eqqumaffigeqqussavaa. Tamatuma inissiamik pisinermi aningaasartuutissanik naatsorsuisarneq sunnersimavaa. Taamatuttaaq aningaasat naleerukkiartornerisa ajornartorsiutaanera, illuliornermut atortussaniit ulluinnarni nioqqutissanut annertunerpaatigut tamaginni akigititat qaffasinnerulernerannik malitseqarpoq. Taamaattumik amerlasuunut aningaasaqarnikkut atorsinnaasut annikillisimapput, tamannalu nammineq inissamut aningaasalersuisinnaanissamut periarfissanut sunneeqqippoq.

Naggasiutigalugu nunanit allamiut Kalaallit Nunaanni pigisamik aalaakkaasumik ullumikkut piginnittooreernerat, aningaaseriviup eqqumaffigeqqussavaa. Ilaatigut Nuup avataani illoqarfinni assigiinngitsuni pigisanik aalaakkaasunik nunanit allamiunik piginnittoqartunik aningaaserivik ilisimasaqarpoq, tassani illuut aasarsiortarfittut atorneqarluni. Nuup avataani illoqarfinni minnerusuni akigititat Nuummi akigititanit appasinnerujussuupput. Tamatuma saniatigut inissiat aamma killilimmik amerlassuseqarput.

Taamaattumik ajornartorsiut illoqarfinni taakkunani aamma atuutissasoq ilimanarpoq.

Maannakkut illunik, inatsisip atuutilernissaa sioqqullugu pisiarineqarsimasunik, piginnittut piginnittussaataitaaginnarnissaat, kisianni siunissami killiliinernit inatsimmi atuutsinneqalersuni pineqartunut ilaanissaat pillugu aalajangersakkamik ilanngussinissap isumaliutersuutiginnissaa pisariaqarsinnaavoq.

Akissut:

Siunnersuummi imm. 7, immikkoortua 3 pillugu:

Aalajangersakkap avaqqutaarinermut atorneqarsinnaanerata aarlerinaateqarnera pillugu Grønlandsbanken A/S-ip oqaaseqaatai tunngavigalugit siunnersuummi imm. 7, immikkoortua 3 peerneqarpoq.

Aalajangersagaq imatut oqaasertaqarpoq:

”Imm. 3. Suliffeqarfik pigisamik aalaakkaasumik, taamaallaat najugaqarfittut piujuartutut atugassamik pisissappat, taannalu niuernermi nalinginnaasumi piffissami piginneqataassutinik taasisinnaatitaanernillu tunniussinissaq pillugit isumaqatigiissuteqarfiusumi 5 mio. koruunit sinnerlugit naleqanngippat imm. 2 atorneqassanngilaq.”

Siunnersuummi imm. 8 pillugu:

Oqaasertaliussamut siunnersuummi Kalaallit Nunaanni pigisamik aalaakkaasumik nunanit allaneersut pisinerinik tunisinerinillu nakkutiginninnissaq paasisimaarinninnissarlu maannakkorpiaq qulakkeerneqassaaq. Nunanit allaneersut Kalaallit Nunaanni pigisamik aalaakkaasumik pisinissaanut killiliinissamut pisariaqartitsisoqarluni, pisinnaasut sioqqutsisumik allattorneqarsinnaanngillat.

Siunnersuummi siunertarineqanngilaq pigisamik aalaakkaasumik nunanit allameersumut tunisinerit suulluunniit periarfissaarutsinnissaat. Siunnersuummi imm. 8-imi Naalakkersuisut maleruagassanit nalinginnaasunit immikkut ittumik akuersissuteqarnissamut piginnaatinneqarput. Siunnersuutip siunertaa imm. 8-mut nassuiaatini erseqqinnerusumik nassuiarneqarpoq.

Pigisamik aalaakkaasumik pigisaqalernissamut akuersissummik qinnuteqaatip nalilersorneqarnerani, qinnuteqaatit ataasiakkaat ataasiakkaatigut nalilersorneqartassasut, tassanilu ilaatinneqassasut pigisamik aalaakkaasumik pigisaqalernissamut siunertaasog, aningaasaqarnikkut sunniutaasussat aamma najukkami pigisanut niuerfimmi sunniinissaq, tusarniaanermut akissuteqaatip kingunerisaanik imm. 8-mut nassuiaatini ilanngunneqarpoq. Nalinginnaasumik niuernikkut ingerlatsinikkullu naliliisoqarsimanersoq, pigisamik aalaakkaasumik pigisaqalernissamut akuersissummik qinnuteqarnermut tapersiisussamik, naliliinermi aammattaaq ilaatinneqartussaavoq.

Maleruagassat nalinginnaasut saneqqunneqarnissaannut immikkut ittumik akuersissuteqarnissamut piginnaatitaanerup allaffissornikkut aqunneqarnera, nalinginnaasumik pisortat ingerlatsinerannut inatsisini maleruagassat tunngavigalugit aqunneqartussaavoq. Qinnuteqaatit amerlassusaat apeqqutaatillugu, piffissap

aalajangersimasup ingerlareernerani aalajangersimanerusumik allaffissornikkut suleriaasissamik pilersitsisoqarsinnaanera anguniarneqassaaq.

Oqaasertaliussaq maannamuugallartoq 2025-p naanissaata tungaanut atuutissaaq aammalu kingusinnerusukkut Kalaallit Nunaanni pigisamik aalaakkaasumik nunanit allaneersut pisisarnerannut maleruagassiinissamut maleruagassat allannguutissaannik suliaqartoqarsinnaassaaq.

Kalaallit Nunaanni pigisanut aalaakkaasunut nunanit allaneersut periarfissaqarnerat atuutereersoq pillugu aalajangerakkap allannguuteqartinnagu atuutsiinnarneqarnissaa, Grønlandsbanken A/S siunnersuutigaa.

Siunnersuummi imm. 15 pillugu:

Tamanna siunnersuummi imm. 15 malillugu pisussaavoq, tassani aalajangersarneqarpoq, siunnersuut nalunaarutigineqarneratigut atuutsinneqalissasoq aammalu pigisamik nalilimmik piginnilernissaq pillugu isumaqatigiissutinut, siunnersuutip atuutilernerata kingorna isumaqatigiissutigineqartunut atuutissasoq. Taamaattumik oqaasertaliussaq pigisamik nalilimmik pigisaqarnernut atuutereersunut, siunnersuutip atuutilernissaa sioqqullugu pisiarineqartunut, atuutissanani. Taamaattoq oqaatigineqarpoq pigisap nalillip nunanit allamiunit pigineqartup kingusinnerusukkut tunniunneqarnera siunnersuummi pineqartunut ilaatinneqartussaasoq.

Ilanngussaq 2**Tusarniaaneq pillugu allakkiaq****(Pigisanik aalaakkaasunik piginnaatitaaffimmik pisisarneq imaluunniit atuisinnaatitaaneq pillugu Inatsisartut inatsisaat**

1. Pigisanik aalaakkaasunik piginnaatitaaffimmik pisisarneq imaluunniit atuisinnaatitaaneq pillugu Inatsisartut inatsisissaattut siunnersuut, kalaallisut qallunaatullu nittartakkami tamanut saqqummiunneqarpoq: Tamanut ammasumik tusarniutigineqarnera Uunga siunnersuutip: Pigisanik aalaakkaasunik piginnaatitaaffimmik pisisarneq imaluunniit atuisinnaatitaaneq pillugu Inatsisartut inatsisaat juunip 4-ani 2025-mi, juulip 3-ani 2025-mi nal. 12:00 kingusinnerpaamik akissuteqarfissalerlugu.

Siunnersuut mail-ikkut 4. juuni 2025-mi tamanut ammasumik nassiussuunneqarpoq, tusarniaanermi akissuteqarnissamut 3. juuli 2025-mut piffissalerlugu, ukununngalu nassiunneqarpoq:

Nassitsivigineqartut:

Naalakkersuisut Siulittaasuata Naalakkersuisoqarfia (govsec@nanoq.gl)

Aningaasaqarnermut Akileraartarnermullu Naalakkersuisoqarfik (oed@nanoq.gl)

Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut

Naligiissitaanermullu Naalakkersuisoqarfik (isiin@nanoq.gl & asn@nanoq.gl)

Nunanut Allanut Ilisimatusarnermullu Naalakkersuisoqarfik (nap@nanoq.gl)

Ilinniartitaanermut, Kultureqarmut, Timersornermut Ilageeqarnermullu Naalakkersuisoqarfik (ikin@nanoq.gl)

Aalisarnermut, Piniarnermut, Nunalerinnermut Imminullu Pilersornermut Naalakkersuisoqarfik (apn@nanoq.gl)

Meeqqanut, Inuusuttunut Ilaqutariinnullu Naalakkersuisoqarfik (ian@nanoq.gl)

Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisoqarfik (isn@nanoq.gl)

Pinngortitamut Avatangiisinullu Naalakkersuisoqarfik (pan@nanoq.gl)

Peqqissutsimut Inunnullu Innarluutilinnut Naalakkersuisoqarfik (pn@nanoq.gl)

Avannaata Kommunia (avannaata@avannaata.gl)

Kommune Qeqertalik (qeqertalik@qeqertalik.gl)

Qeqqata Kommunia (qeqqata@qeqqata.gl)

Kommuneqarfik Sermersooq (kommuneqarfik@sermersooq.gl)

Kommune Kujalleq (kommune@kujalleq.gl)

Kalaallit Nunaanni Naalagaaffiup Sinnisua (ro@gl.stm.dk)

Ineqarneq pillugu Maalaaruteqartarfik – Atuisartoqarnermut

Unammilleqatigiinnermullu Aqutsisoqarfik (aqa@nanoq.gl)

Nukissiorfiit (kundeservice@nukissiorfiit.gl)

Nusuka (nusuka2004@gmail.com)
 Sulisitsisut (ga@ga.gl)
 Kalaallit Nunaanni Politiit (grl-politi@politi.dk aamma grl-lesek@politi.dk)
 SIK (sik@sik.gl)
 PK-mi siulittaasoq (formanden@pk.gl)
 Greenland Airports (info@airports.gl)
 Asiaq (asiaq@asiaq.gl)
 AK (aknuuk@ak.gl)
 IMAK (imak@imak.gl)
 NPK (info@npk.gl)
 ASG (asg@asg.gl)
 KANUNUPE (kanunupe@gmail.com)
 INI A/S (ini@ini.gl)
 Illuut A/S (info@illuut.gl)
 Iserit A/S (iserit@iserit.gl)
 GrønlandsBANKEN (banken@banken.gl)
 Bankivik (nuuk@bankivik.gl)
 Kalaallit Nunaanni Eqqartuussiviit (post@landsret.gl)
 Lynges.gl (lynges@lynges.gl)
 Igdlo.gl (info@igdlo.gl)
 Netbolig.gl (kontakt@netbolig.gl)
 Nykredit Realkredit A/S aamma Totalkredit A/S (sbry@nykredit.dk)
 DLR Kredit (beb@dlr.dk & spe@dlr.dk)
 Finanstilsynet (kah@ftnet.dk & cbmo@ftnet.dk)

2. Tusarniaanermut killigitap naanerani uku siunnersuummut oqaaseqaatissaqaratik nalunaarput: Atuisartoqarnermut Unammilleqatigiinnermullu Aqutsisoqarfik, Meeqqanut, Inuusuttunut Ilaqutariinnullu Naalakkersuisoqarfik, Bankivik, DLR Kredit, IMAK, SIK aamma Kalaallit Nunaanni Politiit.

Piffissap tusarniaaffiusup naanerani Asiaq-p, GrønlandsBANKEN-ip, Finanstilsynet-ip, Avannaata Kommuniata, Kommune Qeqertaliup aammalu Isumaginninnermut, Suliffeqarnermut Nunamullu Namminermut Naalakkersuisoqarfiup tusarniaanermut akissuteqaataat tiguneqarput.

Tulliuttuni tusarniaanermut akissuteqaatit sinneri issuarneqarput, taakkununga oqaaseqaateqartoqarluni.

Asiaq

Kajumissaarutigaarput inatsisissatut siunnersuummi erseqqissarneqassasoq ilisimatusartut aamma ilinniarfiit ilisimatusartut nunanit allaneersut inatsisip aalajangersagaanut ilaatinneqassanersut – ingammik atortut ilisimatusarnermut atugassat inissinnissaanut

nunaminertamik qinnuteqarneranni, tassani ilaapput uuttortaait aamma atortut allat ilisimatusarnermut atugassat.

Kajumissaarutigaarput Kalaallit Nunaanni ilisimatusarnermi sammisanut qanoq kinguneqassanersut nalilersornissaat aamma nassuiarnerullugit, tassani ilaapput nunanit allanit ilisimatusartunut periarfissat suunersut misissuinerminni atortunik inissiinissaminut nunaminertamik pisinnaajunnaarpata.

Ilisimatusartut nunanit allaneersut siunissami sumiiffinni ilisimatusarnermut suliffeqarfinnik suleqatigiinnermik isumaqatigiissuteqartalissappata ilisimatusarnermut atortumik nunaminertanik inissiiffissaminik, naatsorsuutigaarput kattuffippat aamma kalaallinut ilisimatusarnermut sulialinnut suliassaqaarnerulissasoq. Tamassuma kingunerissavaa suleqateqarnissaq pillugu saaffiginnittoqarnerulernissaa, taassumalu pingaarnertut anguniarnissaa siunertaqassalluni atortunik ikkussuinissamut periarfissarsiorneq – ilisimatusarnerup tungaatigut suleqatigiinnerminngarnit.

Taassuma saniatigut eqqumaffigeqqaarput akisussaaneq aamma unammillernartut pinngorsinnaasut suliaqartut nunanit allamiut atortuminnik ikkussuinissamut akisussaajunnaarpat. Tamanna kinguneqassaaq atoreerneratigut peerneqarnissaat torersaanerlu akisussaaffik sumiffimmi suleqatinut inissinneqarsinnaaneri naleqqutinngimmat.

Akissut:

Assersuutigalugu ilisimatusartut nunanit allaneersut, Kalaallit Nunaanni nalinginnaasumik ilisimatusarnermik ingerlatsisartut nunaminertanik, atortuminnut ilitsivissaminik atugassinneqarsinnaajunnaarnissaat siunertaanngilaq. Siunnersuummi § 9-mi Naalakkersuisut immikkut ittumik akuersissuteqarnissamut piginnaatinneqarput.

Kalaallit Nunaata nunataata ilua minnerpaamik pigisatut aalaakkaasutut pingaaruteqartigaaq, taamaattumillu Naalakkersuisut nunaminertamik atugassinneqarnissamut qinnuteqaatinut akuersissuteqassappata, tamatuma pinnginnerani ilaatigut ilisimatusarnermi siunertaasumik naliliinissamut periarfissinneqarnissaat naapertuuttutut isigineqarpoq.

GrønlandsBANKEN

Pigisanik aalaakkaasunik piginnaatitaaffimmik pisisarneq imaluunniit atuisinnaatitaaneq pillugu Inatsisartut inatsisaannut siunnersuut GrønlandsBANKEN-ip tiguaa. Aningaaseriviup siunnersuut suliassaqaarfimmut 70-72-mut oqaasertaliussamut siunnersuummut nassiunneqartumut, aningaaseriviup 22.januar 2025-mut tusarniaanermut akissuteqarfigisaanut, malitseqartitsinertut isigaa. Aningaaseriviup tusarniaanermut akissuteqaat taanna innersuussutigaa.

Aningaaserivik siunnersuummut akuersaartumik inissisimavoq. Aningaaseriviup naliliinera malillugu akigititat aalajaatsumik ineriartornerat, Kalaallit Nunaanni sapinngisamik amerlanerpaat imminnut inissiamik pilersorsinnaanissaat pillugu anguniakkap naammassinissaanut, neriulluarnarpoq. Aningaaserivik isumaqarpoq Kalaallit Nunaanni inissianik "piviusuunngitsumik" ujartuisarnerup pinngitsoortinnissaanut siunnersuut iluaqutaasinnaasoq.

GrønlandsBANKEN isumaqarpoq Nuummi, ukiunilu tulliuttuni Ilulissani Qaqortumilu, mittarfimmik ammaaneq, siusinnerusukkut takuneqartartunit annertunerusumik Kalaallit Nunaata soqutigineqarnerulerneranik malitseqartussaasoq.

Tamatuma malitsigisaanik ujartuineq annertunerulertussaavoq, taamaalillunilu inissiat akigititatigut unammilleqatigiissutigineqarnerulertussaallutik aammalu Kalaallit Nunaanni aningaasaliinissaq soqutigineqarnerulertussaalluni.

Kalaallit Nunaanni illuutitut niuerfiup annertuumik ujartuineramik sunnersimaneqareernera akigititallu qaffasereernerat kiisalu nalinginnaasumik inissiat piukkunnartut amigaataanerat, eqqarsaatigalugit, pisumi matumani aningaaserivik isumaqarpoq siunnersuut isumatusaarnerusoq.

Taamaattoq GrønlandsBANKEN isumaqarpoq inissiat aamma pigisami aalaakkaasumi nalinginnaasumik inuussutissarsiornermi aningaasaliinerit immikkoortinneqartariaqaraluartut, taamaattumik assersuutigalugu pigisami aalaakkaasumi Kalaallit Nunaanni takornariartitsisarnerup ornigassatullu ineriartornermi nalinginnaasumik niuerneramik tunngavilimmik nunanit allamiut aningaasaliinissaat suliaqarnermi annertuumik akornusiisoqartariaqanngikkaluartoq.

Akissut:

GrønlandsBANKEN-ip suliassaqarfik 70-72-imut oqaasertaliussassatut siunnersuutit tusarniaassutigineqarnerani akissuteqaataanut, 22. januaari 2025-meersumut akissut innersuussutigineqarpoq.

Nunanit allaniit aningaasaliisussat, assersuutigalugu takornariaqarnermut atatillugu pigisanut aalaakkaasunut aningaasaliisinnaajunnaarsinneqarnissaat siunertaanngilaq. Inuit suliffeqarfiillu, sumiiffinni toqqarneqartuni takornarianik sullissinissamut akuersissuteqartarneq pillugu Inatsisartut inatsisaat tunngavigalugu suliaminnik ingerlataqartut siunnersuummi § 7-imut ilaatinneqanngillat.

Siunnersuummi § 9-mi Naalakkersuisut maleruagassanik tamanik atuuttunik saneqqutsinissamut akuersissuteqarnissamut piginnaatinneqarput. § 9-mut nassuiaatini siunnersuut aammalu immikkut ittumik akuersissuteqartarnermut tunngaviusut sukumiisumik nassuiaateqarfigineqarput. Aaqqissuussinermik inunnut imaluunniit ingerlatseqatigiiffinnut/sullissivinnut il.il., Kalaallit Nunaannut attuumassuteqartunut naleqquttumik aqutsisoqarnissaa naatsorsuutigineqartariaqarpoq.

Finanstilsynet

Finanstilsyni teknikkimut tunngasunik ataasiakkaanik oqaaseqaatissaqarpoq:

Inatsisissatut siunnersuutip § 5-ianut:

Suliffeqarfinnut aningaasalersuisartunut, kreditinstitut-inut aamma sillimmasiisarnermut ingerlatseqatigiiffinnut, ilanngullugit inuunermut sillimmasiisarnermut ingerlatseqatigiiffiit kiisalu soraarnerussutisiassanut aningaasaateqarfiit allallu Danmarkimi, Kalallit Nunaanni imaluunniit Savalimmiuni najugaqartut, aammalu Finanstilsynet-imit imaluunniit Tryggingareftirlitið-imit nakkutigineqartussaasunut aalajangersagaq atuuppoq.

Aningaasersuineramik ingerlataqarneq pillugu inatsimmi, aningaasersuineramik ingerlatat tassaatinneqarput aningaaseriviit, pigisanik aalaakkaasunik qularnaveeqqusiilluni taarsigassarsisitsisarfiit aamma aningaasaliineramik aqutsivittut ingerlatseqatigiiffiit, tak. Aningaasersuineramik ingerlataqarneq pillugu nalunaarut nr. 650, 9. juni 2025-meersumi § 5, imm. 1. Kreditinstitutit tassaapput aningaaseriviit aamma pigisanik aalaakkaasunik qularnaveeqqusiilluni taarsigassarsisitsisarfiit. Suliffeqarfiit sorliit § 5-imut ilaatinneqarnersut toqqaannartumik allassimanngilaq. Inatsisissatut siunnersuummi matumani suliffeqarfiit aningaasalersuisartut pineqartillugit aningaaseriviit, pigisanik aalaakkaasunik qularnaveeqqusiilluni taarsigassarsisitsisarfiit kiisalu sillimmasiisarfiit aamma soraarnerussutisiassanut aningaasaateqarfiit pineqarpat?

Suliffeqarfiit pineqartut ersarinnerusumik nassuiaatigissallugit isumaliutigineqarsinnaavoq, ilaatigut aningaasersuineramik ingerlatat xxx-mik taallugit.

Oqaaseqaatit siunnersuutissatut allaqqitassiamut, oqaaseqaatinullu atuuppoq.

Oqaaseqaatinut:

Nassuiaatini qupperneq 3-mi allassimavoq, ”Aammattaaq aningaasaqarnikkut sullissiviit taaneqartut, Aningaasaqarnermut ministereqarfimmit aamma Tryggingareftirlitið-imit nakkutigineqarnissaat pingaartinneqarpoq.” Finansministeria pinnagu Finanstilsyni pineqarpa?

Nassuiaatini qupperneq 3-mi aamma allassimavoq, ”*Kiisalu Namminersorlutik Oqartussat pensioninik katersuiviit suleqatigalugit pensioninik katersuiviit Kalaallit Nunaanni pigisanut aalaakkaasunut aningaasaliisarnissamut periarfissanik sinaakkutissanillu misissuinissaat pingaartinneqarpoq.*” Suleqatigiinnermut tassunga Finanstilsyni ilisimasaqarnngilaq. Taamaattoq sillimmasiisarfiit imaluunniit inuunermut sillimmasiisarnermut ingerlatseqatigiiffiit aamma ilaatinneqassanersut isumaliutigineqarsinnaavoq.

Akissut:

Oqaaseqaatit tusaatissatut tiguneqarput.

§ 5 imatut oqaasertalerneqassaaq:

Aningaaseriviit, realkredit-imik taarsigassarsititsisarfiit, ingerlatseqatigiiffiit aningaasaliissutinik aqutsisartut, sillimmasiisarfiit, taakkunungalu ilanngullugit inuunermut sillimmasiisarfiit kiisalu soraarnerussutisiassanut aningaasaateqarfiit aamma suliffeqarfiit soraarnerussutisiassanik katersuisarfii il.il., Danmarkimi, Kalallit Nunaanni imaluunniit Savalimmiuni najugaqartut, aammalu Finanstilsynet-imit imaluunniit Tryggingareftirlitið-imit nakkutigineqartut, Kalaallit Nunaanni pigisanut aalaakkaasunut piginnaatitaaffimmik atuisinnaatitaanermilluunniit pisisinnaatitaapput, kiisalu nunaminertanik atuisinnaatitaalersinnaallutik.

Nassuiaatit, aamma qupp. 2-miittut ilanngullugit, naleqqussarneqarput, tassanilu Finanstilsynet Finansministeriet-imut taarsiunneqarpoq.

Soraarnerussutisiassanut katersisarfinnik suleqateqarneq pillugu immikkoortoq allanngortinneqanngilaq, tamanna maanna pissusiusunut naapertuummat.

Avannaata Kommunia

Kalaallit Nunaanni inissianik illuutinillu niuernikkut nunanit allanit aningaasannanniuteqarniartarnermut, aammalu nunarsuarmi naalakkersuinikkut ingerlatsinermi soqutiginnittunut illersuisoqarnissaanik pisariaqartitsisoqarnera Avannaata Kommuniata akuersaarpaa. Nunanit allanit Kalaallit Nunaanni innuttaasut nunanit allanit inissianik niuernikkut ingerlataqartunit inorsinneqannginnissaat pingaaruteqarlunnarpoq, taamaammallu malittarisassasiornissamut siunertaq kommunip taperserpaa.

Peqatigitillugu inatsisissatut siunnersuut taamannak isikkoqartillugu, kommunip naliliinera malillugu, oqimaqatigiinnngittumik imaqarpoq aammalu naak siunertaanngikkaluartumik naapertuilluanngitsumillu assigiinngisitsisoqaratartoqarsinnaagaluartoq.

Nunanit allameersut inissianik attartuisarnerat

Aallaqqaasiutigalugu Avannaata Kommuniata maluginiarpaa, inunnut qallunaatut innuttaassuseqanngitsunut, Kalaallit Nunaanni inimik attartornissamut periarfissamik matumani annertuumik killiliisoqartoq.

Inatsisissatut siunnersuut malillugu, inuit, qallunaatut innuttaassuseqanngitsut, aamma Kalaallit Nunaanni ukiuni marlunni najugaqarsimanatillu akileraarsimanngitsut, taamaallaat akunnittarfinni, Airbnb-ni, tikeraat ineeraanni il.il. inississinnaapput. Tamanna taamaallaat pisinnaavoq piffissami utaqqisaasumi, erseqqinnerusumik nassuiarneqanngitsumi. Naalakkersuisut *utaqqiisaasumik* atuisinnaatitaaneq pillugu erseqqinnerusumik malittarisassiorsinnaanerat kommunimit eqqumaffigineqarpoq.

Inuit qallunaatut innuttaassuseqanngitsut, aammalu Kalaallit Nunaanni najugaqariinngitsut, piffissami sivikinnerusumi sivilunerusumiluunniit Kalaallit Nunaanni inissiamik attartorsinnaanissartik qulakkeerinissinnaannginnerat kissaatigineqanngitsunik kinguneqarsinnaanera kommunip nalilerpaa, pissutigalugu Naalakkersuisut akuersissuteqarnissaannik piumasaqaatitaqarmat, tamatumalu saniatigut nalorninermik pilersitsinerup qaavatigut qinnuteqaatit suliarinissaannut allaffissornertaqangaatsiartussaammat.

Assersuutigalugu naatsorsuutigisariaqarpoq, sanaartugassat anginerusut, soorlu Utoqqarmiut Kangerluarsunnguanni erngup nukinganik innaallagissiorfiup annertusaavigineqarnissaanut Qasigiannguillu kujataatungaani nutaamik erngup nukinganik innaallagissiorfiliornissamut atatillugu inuit amerlasuut Danmarkimi innuttaassuseqanngitsut aamma Kalaallit Nunaanni najugaqariinngitsut, piffissami sivisuumi Kalaallit Nunaanni inissiffissaqartariaqartussaassapput. Ilaatigut tammaarsimaarfinni sanaartorfiusut eqqaanni najugaqassapput, aammali naatsorsuutigineqartariaqarpoq, ilaat amerlasuut illoqarfinni ininik attartortariaqassasut.

Tamakku saniatigut aamma eqqaaneqarsinnaapput paarlaasseqatigiilluni ilinniagaqartut, takornarianik angallassisartut aamma assersuutigalugu napparsimavinni sulisut, siunissaq eqqarsaatigalugu tassaaleriartorumaartut inuit qallunaatut innuttaassuseqanngitsut.

Avannaata Kommuniata Naalakkersuisoqarfimmut inassutigissavaa, inissianik attartornissamut periarfissat inatsisissatut siunnersuummisulli sukangatigisariaqarnersut eqqarsaatigeqqeqqullugu.

Missingiummi pigisanik aalaakkaasunik attartorneq ilanngunneqarsimammat, naatsorsuutigisariaqarpoq, tamakkiisuunngikkaluartumik, pigisamik aalaakkaasumik/inissiamik pineqartumik pisinissamut inerteqqut avaqqunniarlugu attartornermut isumaqatigiissut atorineqarsinnaaneranik tunngaveqarsimassasoq.

Assersuutigalugu piffissaq attartorfiusussaq ukiuni 100-ni attartorneqarsinnaaneramik isumaqatigiissuteqartoqarsinnaalluni.

Aaqqiissutissatut periarfissaasinnaasoq tassaavoq, piffissap attartorfiusinnaasup sivilunerpaaffissaanik killeqartitsineq, assersuutigalugu ukiunik marlunnik pingasunilluunniit sivilunerpaaffilerlugu, aamma taamaalilluni inatsisissatut siunnersuummi missingiummi § 4 naapertorlugu attartorfiusup piffisalerneqarnera najugaqarsimanissamut sivilussusiliinermik kinguneqartitsisoqartariaqarnani.

Qulaani taaneqartoq periarfissaanngippat, eqqarsaatigineqarsinnaavoq, inunnut aalajangersimasunut qallunaatut innuttaassuseqanngitsunut immikkut periarfissiinissaq, soorlu inunnut pisortani sulisunut, inunnut Kalaallit Nunaanniittunut sanaartukkanut angisuunut atatillugu suliaartortunut aamma paarlaasseqatigiissinikkut ilinniariarsimasunut il.il.

Qallunaatut innuttaassuseqarnermik ingasaassilluni pingaartitsineq

Siunnersuut malillugu inuit qallunaatut innuttaassusillit kiserluinnangajammik tamakkuninnga pigisaqarsinnaanerak ammaffiginiarneqarpoq, innuttaasullu qallunaatut innuttaassuseqanngitsut mattunniarneqarlutik, naak aamma aalajangersimasumik najugaqaraluartut, akileraartartut Kalaallit Nunaannullu atassuteqaraluartut, taamaattoorli Kalaallit Nunaanni aalajangersimasumik najugaqarnissamik aammalu Kalaallit Nunaanni ukiuni marlunni najugaqareersimasutut nalunaarsuinissamut aammalu ukiuni marlunni sivilunerusuniluunniit Kalaallit Nunaannut tamakkiisumik akileraartarnissamut piumasaqaatit naammassinngikkaluaaraat.

Avannaata Kommunia isumaqarpoq, pigisanut aalaakkaasunut nunaminertanullu piginnittuusinnaaneq, aalajangersimasumik najugaqarnermik, akileraartartuunermik, najukkamullu atassuteqarnermik annertunerusumk tunngaveqartariaqartoq - naalagaaffimmi innuttaassuseq kisiat aallaaviginagu.

Akuersinissamut piumasaqaatit ersarluttut

Ersarissumik maleruagassiortoqaqqaartinnagu Naalakkersuisut akuersissuteqartarnernut kisimiillutik aalajangiisinnaanerannik siunnersuummi siunniunneqarpoq. Tamanna pigisanut aalaakkaasunut piginnittooreersunut siunissamilu qinnuteqarusuttunut nalornisitsinermik pilersitsivoq. Kaammattuutigineqarpoq, aalajangiinermi piumasaqaatit akimut ersittut, kinaassusersiunngitsut aammalu misilinneqarsinnaasut aalajangiunneqassasut.

Najukkami ineriartornerup kalaallillu suliniutaannik unitsitsisoqaratarsinnaanera

Siunnersuutip kalaallit maaniluunniit najugaqavissut, qallunaatut innuttaassuseqanngitsut aningaasalersuinissaat mattussinnaavai - illuatungaatigulli qallunaat suliffeqarfiutaat aningaasalersuinnermillu suliaqartut ammaassinnaallugit. Nunatsinni ineriartortitsisinnaassuseqarneq sanngiillisinneqarsinnaavoq assigiinngiitsinertullu misigisoqarsinnaalluni. Kalaallit piumasaat aallaavigalugit, Kalaallit Nunaat ineriartortinneqarsinnaasariaqarpoq.

Aningaasaqarnikkut kingunerisinnaasat

Kommuni isumaqarpoq siunnersuut saqqummiunneqarsimasoq, aningaasarsiornikkut annertoorujussuarmik kingunerluuteqartitsisinnaasoq, ilaatigut makku pissutigalugit:

- Najukkani innuttaasut qallunaatut innuttaassuseqanngitsut aningaasalersuinerat unikaallatsinneqarsinnaavoq, nunaqarfinni isorliunerusunilu pigisanik aalaakkaasunik pisisartooreeraluartunut, sanasarlutik piffissap ingerlanerani aserfallatsaaliuisarsimagaluartunut
- Aningaasarsiornermut saniatigullu inuussutissarsiornermut iluaqutaasut - ass. sanasunut, suliffiutilinnut sanaartornermi illuliornermilu atortussanik nioqquteqartunut aningaasarsiorfissanik annaasaqartoqarsinnaammat
- Sumiiffinni, pigisanik aalaakkaasunik pisiumanerup appasereerfiini, pigisat nalillit akiisa sulii appariartuinnaratarsinnaammata
- Nunanit allanit aningaasaliisartunut suleqatigisartakkanullu qulartumik ersersitsinerusinnaammat, kingunerisaanik Kalaallit Nunaat aalaakkaasutut aammalu inuiaqatigiittut ammasutut aningaasaliiffiusinnaasutut upperinninnermut annikillisaataartarsinnaammat.
- Ilutigitillugu Inatsisissatut siunnersuutip kingunerisaanik illunik tunisinerit ikileriarsinnaanerannik malitseqarsinnaanera, taamaasillunilu akitsuutit akileraartarnermullu isertitat aqqutigalugit pisortanut iluanaarutaasinnaasut ikilinissaannik kinguneqarsinnaanera nalilersorneqartariaqarpoq.

Nunanit allameersut pigisanik aalaakkaasunik pisisinnaatitaanerit

Avannaata Kommuniata ilanngullugu maluginiarpaa, inatsisissatut siunnersuummut tunngaviusoq tassaasoq, avataaniit aggersut pigisanut aalaakkaasunut piginnaatitaaffimmik pisiortornerat Kalaallit Nunaanni aningaasalersuisarfiit avaqqullugit aningaasalersorneqartut, pigisanut aalaakkaasunut niuerfimmi pissutsit, akit neqeroortitsisarnerlu ima kiputitaatigisinnaaleratarsinnaaneriniq malitseqarluni, allaat maani najugaqavissut pigisanik aalaakkaasunik pigisaqarnissaminnut attartornissaminnulluunniit periarfissaarutsitaasinnaanerit ileragisariaqarluni.

Mittarfissuit nutaat Atlantiku qulaallugu timmisartuussinernut atorneqartussat aammalu Kalaallit Nunaata avataanit soqutigineqaleraluttuinnarnerata, kingunerisinnaavaa, iluanaarniuteqarnissamik peqquteqartut malitsigisaanik Kalaallit Nunaanni inissianik illuutinillu allanik pisiortortoqaratarsinnaanera, kingusinnerusukkut iluanaarniutaasumik tunineqarnissaat siunertaralugu, matumani akit akitsoraluttuinnaratarsinnaaneri Avannaata Kommuniata isumaqataaffigaa.

Kalaallit Nunaat pillugu soqutigininneq taamaaginnassappat, takornariaqarnerlu kissaatigineqartutut naatsorsuutigineqartutullu ineriartuinnassappat, taava naliliisoqarpoq, Kalaallit Nunaanni sumiiffiit ilaanni illut pigisallu aalakkaasut akii qaffariartuinnarumaaneri pinngitsoorneqarsinnaassanngitsoq, ilaatigut annertoorujussuarmik.

Avannaata Kommuniata nalilerpaa, pilersaarutinik inerisaasartut, aningaasaateqarfissuit (kapitalfondit) allallu pigisanik aalaakkaasunik niuerfimmi iluanaarniutigalugu aningaasaliisartut, Danmarkimi najugaqarsinnaanermisulli aamma Tysklandimi, Islandimi USA-mi nunamiluunniit sorlermi angerlarsimaffeqarsinnaasut.

Tamanna tunngavigalugu, assigiinngisitsinnginnissamik tunngavik aallaavigalugu, inatsit inunnut Kalaallit Nunaanni angerlarsimaffeqanngitsunut tamanut atuuttariaqarpoq, aamma qallunaatut innuttaassusilinnut.

Inuit ilinniagaqarnertik pissutigalugu taamaaqataanilluunniit pissuteqarlutik Kalaallit Nunaata avataani najugaqarallartut, piffissami sivikinnerusumi sivisunerusumiluunniit, inatsimmi ilaatinneqartariaqanngillat.

Kommunip inassuteqaatai

- Kalaallit Nunaanni pigisanut aalaakkaasunut nunaminertanullu atuisinnaaneq pigisaqarsinnaanerlu aalajangersimasumik najugaqarnermik, akileraartussaataitanermik aammalu najukkamut atassuteqarnermik tunngaveqartinneqassasoq, naak aamma ukiuni marlunni aalajangersimasumik najugaqarsimasoqanngikkaluartoq akileraartussaataasoaqarsimanngikkaluartorlu kiisalu qallunaatut innuttaassuseqarnek taamak annertutigisumik pingaartippallaarnagu
- Akuersissuteqarnissamut piumasaqaatit erseqqissut, akimut ersittut kinaasusersiornermillu tunngaveqanngitsut eqqunneqassasut
- Kalaallit inuussutissarsiorlut innuttaasullu maani najugaqavissut mattunneqassanngitsut, periarfissaalli nukittorsarneqassasut

- Atuutsitsinnginnerit immikkullu akuersissuteqarsinnaanerit pillugit ersarissunik aalajangersagaliortoqassasoq
- Inatsisissatut siunnersuutip aningaasaqarnikkut kingunerisassai misissorneqassasut inatississamillu suliaqarnerup ingerlaqqinnerani ilaatinneqassasut
- Inatsit ima ilusilerneqassasoq, sumi aalajangersimasumik najugaqarneq Kalaallit Nunaannullu atassuteqarneq pingaartinneqassasut, inuup sumi inunngorsimanera apeqqutaatinnagu. Inatsit naligiissinneqarnissamik tunngaviusoq naapertorlugu inunnut Kalaallit Nunaata avataani najugaqartunut tamanut atuutsinneqartariaqarpoq, aammalu
- inunnut qallunaatut innuttaassusilinnut. Inuit ilinniagaqarnertik pissutigalugu taamaaqataanilluunniit pissuteqarlutik Kalaallit Nunaata avataani najugaqarallartut, piffissami sivikinnerusumi sivisunerusumiluunniit, inatsimmi pineqartariaqanngillat.

Akissut:

- *Kalaallit Nunaanni pigisanut aalaakkaasunut nunaminertanullu atuisinnaaneq pigisaqarsinnaanerlu aalajangersimasumik najugaqarnermik, akileraartussaataitanermik aammalu najukkamut atassuteqarnermik tunngaveqartinneqassasoq, naak aamma ukiuni marlunni aalajangersimasumik najugaqarsimasoqanngikkaluartoq akileraartussaataasoqarsimanngikkaluartorlu kiisalu qallunaatut innuttaassuseqarneq taamak annertutigisumik pingaartippallaarnagu.*

Inatsisissatut siunnersuummi inuit Kalaallit Nunaannut qanittumik attuumassuteqartut salliutinneqarlutik pigisanik aalaakkaasunik piginnittussaataitanissaat atuisinnaatitaanissaallu siunertarineqarpiarpoq.

Kisiannili inuit danskisut innuttaassuseqanngitsut imminut inissianik pilersornermi inissianik attartornissamut periarfissaarutsinneqarnissaat siunertaanngilaq. Inatsisissatut siunnersuummi § 2 naleqqussarneqarpoq, taamaalillunilu inuit danskisut innuttaassuseqanngitsut pigisanik aalaakkaasunik atuisinnaatitaallissapput, aammalu erseqqissarneqarpoq, atuukkallartumik atuisinnaatitaanerit, soorlu inunnit, atuisinnaatitaanissamut ilaatinneqanngitsut.

Tamanna inuit danskisut innuttaassuseqanngitsut ukiuni marlunni najugaqarnissaannut akileraartussaataitanissaannullu piumasaqaammut tunngavigineqarpoq.

Najukkamut attuumassuteqarnerup qanoq ilinerani atorneqartarnissaanut tunngavissanik erseqqissunik aalajangersaasoqanngippat, tamatumunnga aalajangiinissaq ajornartutut

isigineqarpoq, taamatuttaarlu aalajangersimasumik attuumassuteqarnissamut tunngavissaq isumannaatsumik aqunneqarsinnaassanngilaq.

- *Akuersissuteqarnissamut piumasaqaatit erseqqissut, akimut ersittut kinaassusersiornermillu tunngaveqanngitsut eqqunneqassasut.*

Siunnersuummi pigisanik aalajangersimasunik pisinissamut akuersissutit qanoq ilinerani nalunaarutigineqarsinnaanerinit maleruagassanik sukumiisunik allassimasoqanngilaq. Aaqquissuussinerup inunnut ingerlatseqatigiiffinnullu, Kalaallit Nunaannut attuumassuteqartunut naleqquttumik aqunneqarsinnaanissaa naatsorsuutigineqartariaqarpoq. Siunnersuut pingaartumik inuit ingerlatseqatigiiffilluunniit il.il., nunani allani angerlarsimaffeqartut pigisanik aalaakkaasunik nalinginnaasunik, imaluunniit sumiiffinni aalajangersimasuniittunik pisiortorpallaarnissaannik pinngitsoortitsiniarluni aqutsinermut isumaqartussatut naatsorsuutigineqartariaqarpoq.

Kiisalu pissutsit arlallit akuersisoqassappat siumoortumik suunersut ersarissassallugit ajornakusoorsinnaavoq, taamaattumillu aalajangiinissamut Naalakkersuisut naliliinissaat pissusissamisoortutut isigineqarpoq.

- *Kalaallit inuussutissarsiortut innuttaasullu maani najugaqavissut mattunneqassanngitsut, periarfissaalli nukittorsarneqassasut.*

Inatsisissatut siunnersuummi innuttaasut suliffeqarfiillu maani najugallit ilaatigut iluanaarniapiluttut inissianik pisiortornissaannut illersorneqarnissaat siunertarineqarpiarpoq.

- *Inatsisissatut siunnersuutip aningaasaqarnikkut kingunerisassai misissorneqassasut inatsisissamillu suliaqarnerup ingerlaqqinnerani ilaatinneqassasut.*

Inatsisissatut siunnersuutip pisortanut, namminersortunut inuussutissarsiortunullu aningaasaqarnermut kingunerisassai naliliiffigineqarput, taakkulu inatsisissatut siunnersuummut nassuiaatini nalinginnaasuni allassimapput.

Inatsisissatut siunnersuut inuiaqatigiinni suliassanut annertuumik killilersuutaasunik sunniuteqartussatut naliliiffigineqanngilaq.

- *Inatsit ima ilusilernerneqassasoq, sumi aalajangersimasumik najugaqarneq Kalaallit Nunaannullu atassuteqarneq pingaartinneqassasut, inuup sumi inunngorsimanera apeqqutaatinnagu. Inatsit naligiissinneqarnissamik tunngaviusoq naapertorlugu inunnut Kalaallit Nunaata avataani najugaqartunut tamanut atuutsinneqartariaqarpoq.*

Matumani inatsisissatut siunnersuummut nassuiaatit nalinginnaasut aallarniutaani allassimasoq innersuunneqarpoq, tassanilu ilaatigut imatut allassimasoqarpoq:

' Nuummi Ilulissanilu nunani tamalaani mittarfiit ammarneqarneranni Kalaallit Nunaat nunanit tamalaanit soqutigineqarnerulersinneqarpoq. Nunami pissutsit atuuttut Kalaallit Nunaata soqutiginninneqarnernik eqqumaffigineqarneranillu sakkortusaataaginnarsimapput. Nunanit allanit Kalaallit Nunaanni pigisanik aalaakkaasunik pisinissamut soqutigineqartoq takutinneqartarpoq. Ilaatigut inissianik iluanaarniutissanik pisiortornissaq pinngitsoortinniarlugu inuit suliffeqarfiillu kikkut Kalaallit Nunaanni pigisanut aalaakkaasunut piginnaatitaanermik pisisinnaanersut imaluunniit atuisinnaatitaalersinnaanersut, kiisalu nunaminertanik atuinissamut akuersissutinik pissarsisinnaanersut pillugu maleruagassanik arlalinnik aalajangersaasoqarnissaa Naalakkersuisunit kissaatigineqarpoq. '

Inatsisissatut siunnersuut Kalaallit Nunaata eqqumaffigineqarnerata nutaap annertusineranut illersuutaassaaq, tassanilu nunanit allaniit Kalaallit Nunaanni pigisanik aalaakkaasunik pisinissamut soqutiginninneq ilaatinneqarpoq.

Inatsisissatut siunnersuummi Kalaallit Nunaata, Savalimmiut Danmarkillu akornanni ukiorpassuarni ataatsimoorneq, tassungalu ilanngullugu naalagaaffeqatigiinni suliffeqarfiit akornanni suleqatigiittarnermut ileqqut inuillu ataqatigiinnerat allanngartinniarneqanngillat.

Inatsisip inunnut danskisut innuttaassuseqanngitsunut atorineqannginnissaa pissusissamisoorutut naapertuuttutullu isumaqarfiginissaanut tunngavissaqarpoq.

Kommune Qeqertalik

Kommunip oqaaseqaatai matumuuna nassiunneqarput.

Siunnersuut kommuninut, innuttaasunullu allaffissornikkut qaavatigut nammakkiissaaq. Nunaminertamik atuisinnaatitaanissamik qinnuteqartoq siunnersuutip §§ 3-7-ianik aamma § 10-anik ilaatinneqarneranik innuttaasut, suliffeqarfiillu uppersaassapput. Tamanna kommunini nunaminertanik sullissisut pappiararsornerulernissaannik kinguneqassaaq.

Ilanngullugu Kommune Qeqertaliup oqaatigissavaa, nunami allami universiteti nunaannarmi imaluunniit illoqarfiup killeqarfiata iluani uuttuutininik inissiinissaminik qinnuteqartarneratigut, nunaminertamik atugassinneqarnissamik qinnuteqaatit amerlanerusut kommunip suliarisarmagit. Qinnuteqaatit taamak ittut killilersimaarneqarnissaannik siunnersuut siunertaqarpasinngilaq, tamannalu pillugu Kommune Qeqertaliup kaammattuutigissavaa, ilisimatusarnermut atatillugu atortunut il.il. nunaminertat mikinerusut ilaatinneqannginnissaannik aalajangersakkamik ilanngussisoqassasoq.

Akissut:

Naliliineq malillugu allaffissornikkut nammaqataanissaaq killeqarpoq.

Nunaminertamik atugassinneqarnissamut qinnuteqartut amerlanerpaartaasa danskisut innuttaassuseqarnissaat naatsorsuutigineqartariaqarpoq, aammalu ukiuni marlunni Kalaallit

Nunaanni najugaqarnissamut akileraartussaaititaanissamullu piumasaqaat naammassineqarsimanersoq ajornanngitsuaqqamik inuit allattorsimaffiat akileraartarnermullu aqutsisoqarfik aqqutigalugit misissorneqarsinnaavoq.

Aammattaaq inatsisissatut siunnersuuttip ilaatigut pisortanut kingunerisassaanut naliliinermut tunngatillugu inatsisissatut siunnersuummut nassuiaatit nalinginnaasut innersuussutigineqarput.

Kiisalu Asiaq-p tusarniaanermi akissuteqaataanut akissummi ilisimatusartunut il.il. nunaminertanik atugassiisarnermut tunngasoq innersuussutigineqarpoq.

Isumaginninnermut, Suliffeqarnermut Nunamullu Namminermut Naalakkersuisoqarfik

Isumaginninnermut, Suliffeqarnermut Nunamullu Namminermut Naalakkersuisoqarfiup 5. juuni 2025-mi tusarniaassut, matuma siuliani taaneqartoq, oqaaseqaatissaqarnermi 3. juuli 2025-mi akissuteqarnissamut piffissalorneqartoq tiguua.

Tusarniaassut pigisanik aalaakkaasunik piginnaatitaaffimmik pisisarnek imaluunniit atuisinnaatitaaneq pillugu Inatsisartut inatsisissaattut siunnersuummut tunngasuuvoq. Siunnersuummi Kalaallit Nunaanni pigisanik aalaakkaasunik piginnaatitaaffimmik pisisarnermut aamma Kalaallit Nunaanni nunaminertamik atuisinnaatitaanermik pissarsisarnermut maleruagassiuussinissamut nakkutilliinissamullu tunngavissiiinissaq siunertarineqarpoq.

Suliassaqarfik 70-72-imut oqaasertaliussaq nr. 4, 31. januaari 2025-meersoq eqqarsaatigalugu, kiisalu tusarniaanermi najoqqutassat nassiuuneqartut misissoreerlugit, Isumaginninnermut, Suliffeqarnermut Nunamullu Namminermut Naalakkersuisoqarfik imaattunik oqaaseqaatissaqarpoq:

- Inatsisissatut siunnersuummut nassuiaatini¹ § 9, imm. 4-mut tunngatillugu allassimavoq, pigisamik aalaakkaasunik nutaamik sananissamut qinnuteqaateqarnermi aamma suliassap najukkami suliffeqarnermut qanoq isumaqarsinnaaneranut Naalakkersuisut naliliinerat ilaatinneqarsinnaasoq. Tamatumunnga atatillugu Naalakkersuisoqarfimmiit inussiarnersumik suliassaqarfimmut inatsit eqqumaffigeqquneqarpoq, tassungalu Suliffissarsiortarnermut Inatsimmi² avataaniit suliffissarsiortut pillugit maleruagassiuussinissaq ilaatinneqarpoq.

Naalakkersuisoqarfimmiit allamik oqaaseqaatissaqartoqanngilaq.

¹ Siunnersuummut oqaaseqaatit, Nassuiaatit nalinginnaasut, qupp. 9.

² Kalaallit Nunaannut suliffissarsiortut killilersimaarnissaat pillugu Inatsisartut inatsisaat pillugu Namminersorlutik Oqartussat nalunaarutaat nr. 23, 11. marsi 2025-meersoq.

Akissut:

Uppernarsarnejassaaq, illunik nutaanik sananermi sulisut atorneqartartut amerlanersaat sulisuusarmata, avataaniit sulisunik tikisitsisarnermut maleruagassat pillugit inatsisinut ilaareersut, tamannarpiarlu peqqutigalugu illuliani najukkani sulisartunik atuinissap tunngavissat arlaliusut ilaannissinnaanerata isumaqarsinnaanera oqaatigissallugu naleqqutsinneqarmat.